


桂苑筆耕集

二





桂苑筆耕集

(二)

崔致遠著

桂苑筆耕集卷八

泗州于濤常侍

西川陳敬瑄相公

徐州時溥司空三首

諸葛爽相公二首

湖南閔頊尙書

幽州李可舉大王四首

滑州王令公

鹽鐵李都相公二首

龍川裴峴尙書

西川柳常侍

史館蕭遘相公

三相公

翰林侯讎學士

泗州于濤常侍

常侍榮戴貂冠。遠驅熊軾。能施善政。遍恤疲氓。暫牧雄州。已安樂國。斯乃鄭巨君之甘雨。再潤淮邊。卜子夏之儒風。重興泗上。況屬彭門叛亂。仍當汴路艱難。獨守危城。終摧敵壘。果成茂績。實驗全才。且羣師悅挾。續之心。鄰壁縮吞舟之口。仁者有勇。信非虛譚。某昨奉詔書。許令軍賞。設爵而唯憑帝命。舉賢而實契私誠。今則寵換銀璫。威兼鐵柱。敬申厚禮。用報殊功。楚岸風聲。處處而旣傳滅寇。隋堤柳色。年年而祗望行春。拜賀未期。瞻思頗切。某公牒同封送上。云云。

西川陳敬瑄相公

伏睹除書。伏承相公。以祝鳩之榮。兼大貂之貴。禮登八命。寵冠三台。伏惟感慶兼極。伏以掌邦教之司。無人則闕。負國璽之任。有德始居。昔丁固休徵。終叶生松之夢。戴憑與學。曾標奪席之名。然十八年而旣居後時。五十重而何益於事。曷若相公雄臨玉壘。榮奉金輿。昔也坐振風謠。作一方之慈父。今乃立迎天寵。爲萬乘之主人。使西夷免怨於後子。南詔永知於戀聖。是以秩歸鳳闕。化洽龜城。躡高蹤於黃闥。紫扉耀偉質於朱衣。皓帶豈獨一時之盛事。實爲萬代之美譚。某早沐眷知。不任欣抃。云云。

徐州時溥司空

竊以誓於晉乘。則重其執贄往來。諷以楚詞。則愧彼隨波上下。永言有義有禮。唯在知和而和。況乃仁境接邦之彥兮。善鄰存國之寶也。始終相契。今古何殊。去春特辱長牋。兼貽厚幣。使者乃和門上校。貺之以

華棧大宛。引夏殷罪己之言。鋪陳數幅。舉邾魯息民之義。撫綏近封。有以見眞男子之用心。古諸侯之行。事其於景仰。豈可弭忘。今遣專人。聊馳徵信。匪足爲報。永以爲好。伏惟照察。

第二

司空利器倚天。忠誠貫日。授律而舉無遺策。訓戎而動有成功。昨者窮寇驚奔。銳師薄伐。審麟史追逃之勢。展豹篇決勝之機。靜刻羣兇。暗梟戎首。范丹縣側。雷威騰肅。殺之聲。季氏山邊。天罰示告。成之慶。久留盛績。終屬雄才。所謂有非常之人。然後有非常之事。絳灌亦一時俊傑。關張非累世勳庸。鏤姓名於金鼎。玉鐘飾儀形於雲臺。煙閣永言盡美。孰敢爭先。某幸接德隣。深遵義路。每增欣賀。固異等倫。云云。

第三

特辱長牋。俯傳大捷。誘賊將而暗除。梟帥。剗羣兇而遍戢。豺聲。夫何壯哉。誠可畏也。且黃巢謂逃天得計。乃揆日偷生。書罪則竹乏南山。流惡則浪乾東海。逞暴於鋸牙鉤爪。挺災於金闕玉京。煙氛所侵。塗炭皆匝。諸道遞相逗撓。別自倂張。驅兵而未暇。舉旗喪律而先聆返旆。養姦既久。翫寇何安。若非司空。以當春滋雨露之恩。則坐迎龍節。及初夏順雷霆之怒。則立展豹韜。遂得纔發銳師。果殲窮寇。刷國家之積憤。弭州縣之餘殃。所謂三年不飛。終當一戰而霸。況可飲頭而快意。何須擢髮以論辜。有以見報聖天子之恩。固須待舉眞將軍之令。幸聯仁境。先聽好音。欣抃欽矚。翰墨何寄。云云。

諸葛爽相公

伏承親提師旅。遠赴戰征。跋履山川。蒙犯霜露。不審近日尊體何似。急景凋年。寒威肅物。令行麾下。盡忘戰家之傷。望峻寰中。將救瘡痍之患。必有百靈薦祉。七萃成功。遠揚邵元帥之高名。近繼郭汾陽之雄略。卽銷氛祲。遍活烝黎。有心之徒。引領而望。伏惟每加保重。早副禱祈。遠誠所望。云云。

第二

訪聆賊巢。自逃商嶺。久徧許田。蔡師相連。狂鋒尙熾。當使以道途遠隔。行止難知。未施擒鹿之能。但養斬蛟之勇。伏承相公親麾八陣。深運六韜。將靜掃其羣兇。已齊驅其銳旅。旣見三冬擐甲。卽致殊功。方知五月渡瀟。誠爲易事。諸道固當高枕。聖君便可迴鑾。而未測鯨奔。頃防獸搏。凡居戎闔。合審軍機。輒遣專人。遠偵賊勢。幸垂示及。冀助討除。伏惟照鑑。謹狀。

湖南閔頊尙書

親故前河西朱大夫到。遠垂書示。深荷眷私。兼將尙書弄馬圖。及貴府祥瑞事跡相示。閱覽忘倦。欣仰有餘。且武藝所稱。歷朝可數。楚誇徹札。魯銜蒙輪。彎三百斤之長弓。嘗傳漢史。掉八十斤之雙戟。亦著魏書。然而唯守一隅。莫能四達。長於射而短於御。力甚壯而心甚怯。永言戎伎。難遇全才。今者尙書術繼白猿。名高赤兔。旣占萬人之敵。眞爲一代之雄。雖居仗鉞之榮。不忘據鞍之勇。爰徵粉繪。妙寫風儀。遍覽左旋右抽。唯知目駭神聳。彼繫縶遑捷。運甓服勤。實謂區區瑣瑣者爾。況乃夢符捧日。政治觀風。花竹呈祥。果驗中興之運。龜龍薦感。皆標上瑞之姿。若非望重行春。歌喧來暮。則何以三軍效勇。永諧欽化之名。七郡

懷恩盡表殊常之應。必期渥澤。繼入瀟湘。此則但睹其電擊雲飛。鷹麟鶚視。每勞企想。無以喻言。唯望愼舉政條。仰酬寵寄。方值四郊多壘。實憑萬里長城。其他中心藏之。永以爲好。幸垂諒察。云云。

幽州李可舉大王

不審自履初夏。尊體動止何如。伏想趙盾日威。雄臨北塞。袁宏風化。遙助南薰。固當九郡懷恩。百靈薦祉。符提白玉。儼標萬里之長城。臺築黃金。遍啓四方之賢路。豈止應掛絲之夢。自然超衣錦之榮。伏惟精愼寢興。別迎寵冊。永扶昌運。大洽羣情。今遣諸葛果卿。假以郵巡修聘。旣愧未成好幣。又慮或失良材。無限違誠。各具別狀。云云。

第二

雲龍在想。風馬異區。末由傾蓋之誠。空切著鞭之望。雖傳鱗翼。莫寫肺肝。況某俯顧家門。忝同里閭。每詠維桑之什。卽懷喬木之恩。幸蒙侍中大王。不賤家邱。深知國產。曲垂厚獎。頻辱好音。然則苟能知心。何假會面。以斯佩荷。可鑑依攀。今緣國患未除。鄰讎不戢。甚欲愼言結舌。其如憤氣填胸。略假牋毫。具陳事實。恃惠子之知我。望明王之鑑賢。伏惟恩私。遠察誠素。云云。

第三

伏以蜂蟻巢窠。猶能稔惡。熊羆隊伍。未見摧兇。在於義士忠臣。莫不痛心疾首。某蓋謂去年奉詔。遂於近境旋師。然今若終不自行。必恐竟無所就。已從中夏。遍閱大軍。待剋淮戎。卽登汴道。但以指其百勝。決此

一行人不異心。事希同力。侍中大王。旋築周姓。爵貴漢封。固多報國之誠。常貯安邦之術。見茲禍難。忍不憂勤。某既事征行。輒申控告。伏望差借兵士。助平寇戎。得貴藩精騎五千。勝諸道羸師十萬。行收京闕。尅在旬時。亦已先具奏陳。所貴免成專輒。申包胥之告急。與此雖殊。趙充國之請行。于今可試。幸垂亮察。必賜允從。不敢獨擅茂勳。所冀均分重賞。忠誠之切。實在於斯。伏惟永存始終。早示可否。未聞顯望。可想眷翹云云。

第四

別奉榮緘。遠搜古籍。其於降歎。無以喻陳。且近者列士諸侯。盈庭多士。唯以宦塗銳志。少於儒術留心。而乃侍中大王。博古通今。去華取實。燕碣石之接士。已繼芳蹤。漢維城之好書。遠符仁旨。是以訪遺編於汲冢。尋墜簡於魯宮。然則荆軻易水之歌。徒聆壯氣。召伯甘棠之詠。虛播政聲。豈若博采聖人之書。用光君子之道。但懷鑽仰。敢覬切磋。況某久擁戎旂。難親講席。耽讀闕五千卷之數。藏貯無三十車之多。自奉指蹤。願申誠懇。遍令列肆。廣集異書。冀資日益之功。寧憚風詠之過。必可徵名東觀。承乏西齋。伏惟俯賜鑑察云云。

滑州王令公

某蒙恩忝官。不任感懼。某粗傳堂構。謬荷國恩。然而術略素貧。勳勞甚淺。早分相印。累陟師壇。每遇福過災生。蓋爲材微任重。一自四郊多壘。萬乘蒙塵。未施毫髮之功。深負咽喉之寄。羊皮狐腋。空思趙簡子之

言瓦釜黃鍾。寧免楚大夫之歎。旣難展用。唯願退閑。方欲瀝血拜章。奉身請老。豈料更隨衆例。亦忝殊榮。遽登常伯之高資。復益實封之異寵。伐檀可懼。橫草何申。伏緣遞路不通。制書未到。先垂榮問。過辱獎詞。旣聆天上之音。不愧月中之夢。末由陳謝。但切兢惶。云云。

鹽鐵李都相公

某蒙恩忝官。不任感懼。伏以納言峻秩。眞食殊榮。有扶持社稷之功。有燮理陰陽之術。方居正位。允洽羣情。如某德乏潤身。智慚周物。況逢多事。未展壯圖。動無效於啓行。靜有乖於臥理。加以久司莞貨。實寡籌謀。旣虧於富國贍軍。深愧於木牛流馬。唯甘黜削。永遂優閒。豈料聖澤無偏。戎藩有忝。轉飛盡鹿。昔年而莫見休徵。冠簪豐貂。今日而愈慚非據。仍加班邑。何報聖朝。此皆僕射每賜保持。得榮交伐。唯期勵節。共願匡時。陳謝末由。依攀益切。云云。

第二

竊以世途易變。時事難言。泛泛如水中自安。滔滔者天下皆是。雖董卓已燃巨腹。衆切歡呼。而桓彝若有忠魂。潛應慟哭。每窺師律。空激壯圖。今則大駕未旋。外藩多難。獲利者唯謀潤屋。握兵者誰解清宮。當道雖乏供須。但勤貢獻。願早迴於御輦。難空倚於賦輿。割占所因。指搗斯在。必希朗鑑。深察鄙誠。其他卽遣專人。冀具後狀。云云。

龍州裴峴尙書

遠勞專介。特枉華絨。發函睹不滅之蹤。滿幅示相憂之旨。其於佩惠。何以寄言。且國步猶艱。天心難測。忠直者輟聲戢影。姦邪者鼓舌簸唇。彼旣一時。此須三黜。唯當竭節。豈足興言。尙書偶值危時。暫淹雅望。將期歷試。無限卑棲。寵辱若驚。周柱史非無意也。行藏自保。魯司寇有是言乎。多謝故人。勉報聖主。分憂救瘼。爲政非輕。志操不虧。恩榮斯在。伏惟諒察。云云。

西川柳常侍

某頃鎮龜城。別營雉堞。蓋符天意。得就土功。今者幸遇巡遊。謂申績效。久留御輦。俾立豐碑。杜元凱方愧勳名。李元盛敢言德政。雖忝當功受賞。其如見寵若驚。常侍直道而行。樂人之善。遠垂華翰。過辱獎詞。以永傳不朽之譚。先見未來之事。可使美掩蜀都之賦。高齊劍閣之銘。荷戴兢慚。無以指喻。伏惟照察。云云。

史館蕭遘相公

某日無勞效。天降寵光。雖雨露常均。不辭潤物。而邱山漸重。莫遂安身。況蒙相公。察以獨立聖朝。勤行直道。迴乖芘賴。免使湮沉。旣闢洪爐。辱陶鎔之厚賜。仍揮彩筆。煩刻畫之妍詞。以爲動有成功。前無強敵。撫寧淮甸。靜戢煙塵。繼陳任土之儀。遠瀝望雲之懇。遂使榮升畫室。特解牢盆。更增班邑之恩。尙假統兵之位。仰窺華翰。俯揣凡材。未能息多壘之災。何以竊長城之譽。唯期激勵。少報生成。拜賜未前。懷仁益切。云云。

三相公

某夢恩忝官。不任感懼。伏以風后古官。是聖代弼諧所重。國僑美賞。非賢才負荷固難。必也挺秀儒林。鉤深學海。方可奪席占五十重之譽。享秩稱二千石之榮。如某任重咽喉。功微毫髮。早提兵柄。不能靜剗寇戎。久握利權。無以廣資經費。雖進退每從於帝命。而否臧實愧於軍謀。以茲責躬。無所逃罪。但願罷歸林藪。絕望雲霄。豈料宸襟。猶傷墜履。自上安下方。慚畫鹿之幡。居高飲清。忽戴附蟬之冕。解煩難於平準。增寵祿於實封。此皆相公啓導睿慈。底安戎律。使貞金鍊火。免銷耗於毒煙。直材摧霜。更敷榮於聖日。唯當親驅銳旅。幸討羣兇。冀成破竹之功。少贖伐檀之効。未由陳謝。悚惕增深。云云。

翰林侯翽學士

某材略素貧。勳勞甚薄。謬蒙睿渥。累陟華資。今者拜以古官。加之眞食。伏蒙學士親奉宸睴。過垂獎詞。煩郭璞之彩毫。榮勝軒冕。使夷吾之瑣器。頓異斗筭。遭逢實契於百生。銘鏤豈唯於一字。但冀仰憑筆陣。更鍊戎韜。充國壯心。早遂征行之望。無鹽陋質。免慚刻畫之恩。荷戴兢惶。不任誠懇。未由拜賜。但切依攀。云云。

桂苑筆耕集卷九

都統王令公三首

浙西周寶司空五首

宜歛裴虔餘尙書三首

壁州鄭凝績尙書二首

太保相公鄭畋一首

護軍鄒公甫將軍三首

前左省衛增常侍一首

泗州于濤尙書二首

都統王令公

近者專馳賀狀。伏計已覽卑誠。久絕來音。但多景戀。令公始終陶冶。表裏經綸。王商能止於訛言。謝萬暫提其勁卒。奪窮寇姦兇之魄。活疲甯震懾之魂。行旣順天。捷當克日。某比承詔旨。久緩師期。今伏見令公。命許君親身先將校。幸叶彈冠之望。倍驚投袂之心。已閱全師。旣離弊鎮。雖自稱岸上之虎。或謂當仁。而不畏水中之龍。實歸重德。唯期助役。非敢貪功。欲取來月上旬。決謀進退。直衝宋野。先會梁園。請遣專人。

咨探行李。輒覲迴信。聊紓遠懷。伏惟恩私。深賜鑑察。云云。

第二

累專寓狀。粗得輸誠。繼奉榮緘。益銘殊眷。不審近日尊體何似。夏星沒火。秋琯飄灰。佇妖氣之雪銷。想軍聲之雷振。伏計振振君子之德。伋伋勇夫之誠。足可憑有慶之威。誓無譁之衆。功期一舉。勢必萬全。謝太傅之智謀。預知大捷。鮑參軍之歌詠。唯佇中興。伏惟慎保節宣。用諧時望。某常銜曩顧。況捧溫言。朝禱暮祈。可量卑懇。云云。

第三

某自承令公親率銳師。佇殲窮寇。使謀訓練。欲赴戰征。願折豺牙。仰瞻馬首。履山川而犯霜露。久決心期。擐甲冑而峙糗糧。早成力辦。不料徐戎忽聚。費誓猶陳。未豁征途。難通饋輦。以此早申誠懇。但切憂惶。伏想萬夫爭殲。弩之先。八表望建囊之令。佇見龍歸魏闕。卻迎鳳舞荀池。雖居喙息。跂行盡解。口祈心禱。某早窺偉量。遙稟壯圖。仰視旄頭。漸覓奔藏之處。俯看屐齒。唯懷斷折之虞。恭竢捷音。專申賀禮。未前祝望。不暇啓陳。云云。

浙西周寶司空

昨奉緘翰。兼寄示書碑樣。眷私既深。披閱無倦。其於榮抃。無以喻陳。某每念久握兵戎。累移節制。雖纘弓裘之業。未揚鍾鼎之勳。況乃來暮歌稀。行春化拙。豈期睿獎。特采微勞。許標不朽之規。遠降非常之寵。至

如仲尼儒術。始流芳於沂水之涓。元凱戰功。方掛美於峴山之頂。愚實何效。遂叨此榮。司空念切憂忘。事諸響應。猥垂恩力。妙選書工。所謂知臣者莫若聖君。成我者固須良友。有始有卒。念茲在茲。彼雖未起。雕鐫此已。先深銘鏤。今者干戈務壅。筆硯事疎。不及別請他人。敬遵來命。唯望早成刊勒。實賴獎憐。其碑詞同封呈上。云云。

第二

錄溫者。包藏異謀。玷污元化。螻蟻暫成聚窟。鳴梟貴欲同巢。誠謂天高可欺。不知日遠能照。果彰罪跡。遂舉刑書。既絕慮於竊鈇。俾成規於用鉞。言堪自賀。事必相傳。豈料司空。染五色毫。飛一兩紙。徵美詞於魯史。辱虛譽於劉牋。烈士除兇。不負國章在手。臨風拜賜。其如戎律拘身。未啓素誠。但銘殊貶。

第三

揚示詔書。仰窺聖旨。佇攀高躅。倍激壯懷。司空寄綰吳門。敢懸魏闕。況奉臣哉之命。必興王者之師。但希水簇舟船。幸遵舊俗。山堆戈甲。早振雄威。副大君旰食之勤。慰下走朝飢之望。某祗看風信。便泛江程。五兩翩飈。解指朝天之路。三軍踴躍。待申破竹之功。許接後塵。遠示行日。儻可從心所欲。必希攜手同行。王導有言。無作楚囚相對。劉琨養勇。以誅逆虜爲期。事可榮今。功何讓古。既銜帝語。勿老師徒。願因江漢之征。得遂瀟湘之遇。云云。

第四

伏以山岳降靈。尹吉甫之全德。風雷奮氣。寶世寧之異祥。況乃景值新秋。時當聖代。間生英傑。高建勳庸。伏惟相公。名可掩瑜。志堪奪璧。魏公子春靈振響。有物皆驚。晉大夫冬日流輝。無人。不愛。深蘊安劉之業。終成佐漢之謀。今則又慶生辰。永資景福。出握元戎之柄。既播嘉聲。入持宰相之權。卽迎急詔。禱祝攀戀。不任下情。有少續壽之儀。謹具別狀寄獻。云云。

第五

專使押衙傅遜至。啓閱華緘。奉承珍貺。光輝奪目。荷戴銘心。況承已奉堯言。永除回恐。繼好息民之義。遠耀麟經。輸忠報主之誠。頻傳雁訊。喜氣連鋪於兩岸。嘉聲遍振於四隣。敬仰成規。深敦曩契。唯願內防謁譖。外息狐疑。必期戮力於公家。不敢欺心於閭室。伏惟深賜。云云。

宣歙裴虔餘尙書

今月十六日。裴校書至。伏蒙深追曩顧。迴黜違言。損之以榮賤。辱之以好幣。情敦刻畫。無非譽過之詞。事繁琢磨。宛是愛忘之眷。旣多受賜。永切銜知。不審自履閨秋。尊體何似。伏想蟬噪暮景。鶴叫晴空。樓下長溪。閱政聲而不息。窗中遠岫。引詩思以無窮。伏惟侍膳之餘。公退之暇。精加保愛。佇俟寵徵。某早願攀嵇。近蒙善鄭。深祝瞻望。豈任下情。云云。

第二

去年因景氏子。有小人言。讒誣之事多興。噂噉之詞不少。動成忌器。久阻親仁。昨以戎首旣摧。禍胎自剖。

遂修舊好。聊達微誠。伏蒙尙書。特請嘉賓。遠費厚幣。俾息四方之笑。永通兩地之歡。捧嘉貺而增榮。窺雅言而竊抃。況對蓮池之客。實逢桂苑之仙。自此句渚清波。已能流惡。隋河遠派。亦得洗瑕。鍊多而既識金精。燒罷而共知玉冷。伏惟仁鑑。俯察愚衷。云云。

第三

當司宣歙院。被浙西越局侵權。差官奪務。以強自恃。謂暴無傷。仰計通仁。備詳深弊。今者鹺務。卻仍舊貫。已有詔書。浙西雖近宋驛。固殊魯瘠。只解租庸副職。尙提招討兵符。宜慚已往之非。用結將來之好。竊知猶尋亂轍。愈弄雄權。再署周正。罔思唐令。宣歙院上違聖旨。下阻羣情。實虧臣子之誠。豈道鬼神之怒。既失用和爲貴。唯知長惡不悛。伏望尙書洞察事情。俾全理體。雖知秦鏡。固無遺鑑之虞。或恐齊竽。猶有濫吹之誚。能摧狡妄。遠托威嚴。亦慮官吏驚疑。必望深加撫恤。幸甚。

壁州鄭凝績尙書

賢尊相公。不閒庸虛。早垂眷顧。每念攀鴻之懇。頻傳繫雁之書。動皆陶侃之手蹤。曾非陳遵之口占。寶玩而字終不滅。何翅三年。輝榮而恩有所從。倍賢十部。況與尙書。頃依鳳里。已覲龍章。清談深仰於阿戎。異禮得攀於侯昱。高山仰止。何日忘之。今者遠辱榮緘。過垂虛譽。永言抃荷。但務鐫銘。云云。

第二

某素無材術。謬荷寵章。頃握兵權。方舉上將軍之令。爰沾睿渥。叨承大司馬之榮。仰覲鳳書。深慚豹略。此

時未審尙書。躡八花墀之影。綴五色筆之詞。刻畫恩深。游揚意重。不獲早申感激。遠謝褒稱。又奉華緘。方知麗藻。雖早榮紙貴。固無愧於士安。而每想筆乾。實有慚於元照。旣多闕禮。何贖深辜。伏惟睿私。終賜恕察。云云。

太保相公鄭畋

自承相公大郎。再持廟筭。大庇藩條。況蒙特假陶鈞。正歸權筦。雖則魯爲長府。仍舊貫之言行。其如晉閱被廬。作新軍之意切。未能措手。尋見移權。凡所阻難。自能審度。遠垂批示。倍荷恩私。如愚者焉。所獲多矣。敢速官謗。有負親知。伏惟鑑察。云云。

護軍郗公甫將軍

某用舍行藏。唯遵帝命。始終去就。冀洽羣情。仰酬萬乘之知。豈計一朝之忿。昨者繼窺天旨。更勵冰心。遂令專介傳書。願得近鄰釋憾。周相公似能遵稟。免致悔尤。旣知遽環之非。必息廉頗之怒。一帶水永除多梗。九重天實鑑忠誠。自此日聆雞犬之音。風識馬牛之性。往來無壅。彼此相成。斯皆將軍遠贊睿慈。旁均和氣。共成美事。但荷深仁。特辱芳緘。過垂虛譽。銘戴慙惕。豈任下情。

第二

特垂寵示。過辱獎詞。竊知將校官寮。三軍百姓。共陳衆狀。請發奏章。以爲煙塵。自起於四郊。塗炭遍加於九野。唯有斗牛之境。稍無戎馬之災。此實地分所招。天心見庇。蓋烝黎之福也。何功力之有焉。豈料將軍。

過聽衆詞。助成美事。欲煩錄奏。特賜傳言。然以拙政而誘羣情。以虛言而干聖鑒。固爲不可。實所難當。伏惟終寢奏論。俾速官謗。便同受賜。非敢矯言。伏惟允察。云云。

第三

特辱華緘。猥傳吉語。初驚善謔。終荷深仁。某每省庸虛。過沾寵寄。未能報主。豈至封王。雖漢代諸侯。亦流恩於異姓。而周書列爵。須示賞於殊勳。曾無剖竹之聲。詎有分茅之望。旣非實譽。必恐虛傳。但慚眷私。未敢陳謝。云云。

前左省衛增常侍

忽奉榮緘。特垂善謔。宣父則欽遵三益。老君則唯贈一言。仰銜成我之恩。但抱起予之歎。自常侍遠勞仙騎。俯顧弊藩。竊承久陟道途。倦垂軒蓋。戀德而披雲尙阻。懷誠而啓露未期。每憶笑談。莫勝饑渴。某也早以勤行至道。唯希翊贊聖朝。張良正遇於漢恩。敢言絕跡。范蠡未除其越恥。詎欲逃名。非求八百歲以成春。但讀五千言而勵節。幸無大故。且恕小瑕。方願惠然肯來。豈將率爾而對。云云。

泗州于濤尙書

蠡彼徐戎。聚茲餘燼。敢侵貴境。再逞姦謀。只應來就誅夷。固可立期撲滅。況尙書德超定國。威跨栗磳。妙略防危。實知孺子可教。強鄰結憾。是表忠臣不和。去年旣振雄威。今日更資茂績。此已微驅衆旅。救援仁封。永言牙爪之勤。須託指蹤之妙。願諸羣望。暫屈長才。輒敢請充都指揮使。仰俟一呼之命。同成九拒之

功冀耀兵權。早燿寇黨。得脫齊桓之恥。唯憑卻縠之賢。伏惟睿私。深賜照察。

第二

昨者竊聆有拔城之議。遂申忠告。冀保遠圖。伏奉迴緘。得窺深旨。且徐戎肆虐。固非楚子之能。泗俗懷忠。不比蕭人之怯。欲謀自潰。何謂克終。雖云有慮於防川。豈可潛思於坐井。某近奉詔旨。頗促軍期。卽得經過貴州。便可剷除寇壘。未見殷輪之苦。且更勉旃。其於破釜之言。已承命也。他具前狀。此不繁陳。云云。

桂苑筆耕集卷十

魏博韓簡侍中一首

鄂州崔紹大夫一首

考功蔣泳郎中一首

前泗州鄭廉常侍一首

新羅探候使朴仁範員外一首

蕭邁相公二首

田軍容一首

都統王令公賀冬一首

浙西周寶相公一首

前宣歙裴虔餘尙書一首

幽州李可舉太保五首

徐泗時司空一首

田令孜軍容送器物一首

振武赫連鐸尙書謝馬狗一首

幽州李可舉大王一首

魏博韓簡侍中

一自黃巾北侵。翠輦西幸。蝗無避境。蟻已壞堤。內無宮闕之灾。外結藩維之恥。諸葛爽者。豕食難飽。豺聲易驕。卻臨迷途。敢凌貴圉。侍中手驅虎隊。心閱豹韜。一陣纔施。三城遂復。雄功始見。冊命俄臨。永爲壯士之盛談。別作諸侯之美事。某昨欲剖巢燠穴。久爲淬甲厲兵。及出師徒。又蒙詔旨。且令利權山海。鎮壓江淮。一弭國讎。先資邦賦。然其奈夜眠軍幕。霜橫枕上之戈。曉掛戎衣。雷吼匣中之劍。終願親揚勇略。靜滅兇徒。伏惟鑑察。

鄂州崔紹大夫

遠蒙仁私。特示表藁。其於歎仰。無以喻陳。某夙練戎韜。願裨王略。不愧於管天錐地。猶勤於撮壤導涓。遂敢累貢忠誠。冀迴聖鑑。儻或六龍下峽。豈同五馬渡江。中朝之禮樂無虧。下武之功猷斯在。果蒙大夫惠於宗族。贊以表章。過垂華袞之褒。益睹彩毫之妙。古詩云。不惜歌者苦。但傷知音稀。今日知音。幸遇之矣。然榮示中媿茂安之德業。齊越石之機謀。自顧瑣才。何當虛譽。今則王導清望。已推於首座相公。劉琨至誠。亦付於襄陽僕射。必期英鑑。永察愚衷。云云。

考功蔣泳郎中

特勞專介。忽辱榮緘。過垂軒冕之褒。永寘巾箱之寶。實慙彼已。豈敢當仁。郎中學士。暫避韞時。偶勞僑跡。今者官清司績。職峻集仙。麟趾殿中。久侍騶鸞之客。螭頭階上。別親吐鳳之才。豈唯舉四善之精詳。蓋必備九重之顧問。鋪陳組繡。演暢絲綸。且也虞夏商周之書。重行聖代。蕭曹魏邴之位。更屬何人。詎可守三徑之寂寥。慮千山之險阻。許垂訪別。專冀祇迎。伏惟眷私。幸賜鑑察。

前泗州鄭廉常侍

竊以寇戎未殄。士卒多驕。凡曰郡侯。實難政理。縱得上和下睦。猶爲朝是夕非。況福乃儻來。禍惟不測。但無慙於屋漏。亦何累於國恩。然而常侍。蓋切奉公。匪疎撫士。雖云驚擾。終免侵傷。有以見爲政無私。當仁有裕。伏承已離泗水。始及淮山。捧閱來緘。攜謙往咎。其於瞻仰。胡可弭忘。然則郡守懸魚。旣繼古人之節。寒翁失馬。可寬達士之懷。云云。

新羅探候使朴仁範員外

忽奉公狀。備睹忠誠。慰愜欽依。但增衷抱。員外芳含雞樹。秀稟鼇山。來登天上之金牌。桂分高影。去陟日邊之粉署。蘭吐餘香。今者仰戀聖朝。遠銜王命。捧琛執贄。棧險航深。能獻款於表章。欲致誠於官守。雖無奉使。難在此時。九州之侯伯傾心。萬國之臣僚沮色。幸來弊鎮。得接清規。況奉貴國大王。特致書信相問。將成美事。不惜直言。儻員外止到淮壖。卻歸海徼。縱得上陳有理。其如外議難防。無念東還。決爲西笑。聖主方深倚望。賢王佇荷寵榮。道路亦通。舟船無壅。勿移素志。勉赴遠行。峽中寇戎。或聚或散。此亦專令防

援必應免致驚憂。且過鬱蒸。可謀征邁。館中有闕。幸垂示之。所來探候事。已令錄表申奏。敬惟鑑察。

蕭遘相公

某累貢表章。請議巡幸。忠誠屢罄。宸睠未迴。冀保始終。再陳利害。匪望河陽之狩。願迎汾水之遊。竊以諸道賦輿。皆遵峽路。多是僞五致一。蓋已萬水千山。後綱不繼。前綱所貢。不如所費。況近者西從蜀國。南至荆門。似有微災。恐遺巨患。忽若草寇侵據。江陵阻艱。則榛梗既多。苞茅莫入。或更蠻戎伺隙。必令越巂勞兵。避柱觸楹。防微可誠。行舟墜劍。執滯固難。某以孝子不諛其親。忠臣不諂其主。遂陳狂瞽。遠黷聖聰。唯望略泛龍舟。暫遷鳳里。庶使九州修貢。不愆任土之宜。四海歸仁。盡遂朝天之望。且賊巢兇狂聚衆。穢黷經時。縱能早覆妖巢。豈可便迴法駕。淮南乃寰中俗富。閩外名高。喻以金甌。永無覺缺。比於玉壘。實異繁華。伏惟相公。居注意之朝。處沃心之位。周成王之卜洛。始託姬公。晉元帝之渡江。終資仲父。早申決議。仰贊宸衷。能成可久之規。益表無私之德。某頃在西川制置。及於南詔通和。雖爲先察於微。豈欲驟稱其伐。但緣相公。皆垂目驗。不敢面欺。則今日荆蜀灾星。未能退舍。吳楚福地。實可遷都。事歸從權。化資垂拱。永致一家之理。必輸萬里之誠。某言不近誣。志唯遠慮。非奪日官之業。冀垂天子之恩。幸望國僑。無譏裨竈。謹以具表陳請。訖伏惟鑑察。

第二

伏以物忌太盛。器滿必傾。自古有言。至今爲誡。苟或不能知止。但欲貪榮。則有折鼎足之虞。炊劍頭之險。

某每念遭逢聖運。紹續舊勳。北定羌戎。南征蠻蜚。東降齊盜。西建蜀城。高提三尺之權。粗展四方之志。然自煙塵聚孽。原野宿兵。曾無敦說之全材。先叨統帥。詎有縱橫之令策。兼領利權。而乃不能首唱義聲。身先銳旅。戮奔鯨於海澤。逐獮犬於秦關。遽及火熾祠籌。塵驚御輦。遠聆巡幸。便議征行。但以每當誓衆之時。卽奉止軍之詔。雖自始終勵節。其如進退失圖。華元與城者之謳。子產致國人之謗。乃有浙侯構隙。沛將加兵。三年已來。二憾不釋。蝸蟻競噪。蚌鷁相譏。厚誣而巧弄舌端。顯奏而亂搖心曲。求刺船而不暇。想投杼以難逃。伏賴相公。照以秦臺。調之伊鼎。察邾公之愬。鄭伯解晉帝之疑。石苞免挂刑章。尙縻寵秩。旣蒙明洗。誠合淬磨。更修克己之心。永竭勤王之力。直以松筠不改。雖自保於堅貞。蒲柳先秋。遽已傷於衰暮。筋骸漸憊。志氣潛摧。縱欲自強。終憂不逮。今者幸遇上京已復。大駕卽迴。麟鬪龍吟。固息興妖之慮。放牛歸馬。實迎偃武之期。某也旣在清時。誠爲棄物。況縈沉痼。深負壯圖。攬鏡無慊。投簪是念。豈慕祁奚。請老尙處冗員。唯思范蠡。愛閒得行素意。乞解所職。自卜爲宜。伏惟相公。選士惟賢。選人以禮。俯矜羸劣。特賜允從。雖慚未遂報恩。免更久爲尸祿。仰干陶冶。敬託牋毫。始知調急聲哀。唯愧詞窮理盡。伏惟俯賜恩鑑。

田軍容

某慙無術略。久竊寵榮。提漢法之重權。陟秦官之極品。莫申展效。何贖貪叨。況自寇盜奔侵。京都陷覆。久守咽喉之寄。不成毫髮之功。雖兵柄旣多。固難措手。而君恩未報。實切覲顏。況乃室怒潛興。鄰讎競起。陸

遜徒稱其佳吏。崔暹終憾於癡人。顯奏相誣。多言可畏。幸蒙軍容推心庇護。極力保持。雖遭貝錦之詞。免陷織羅之罪。祇合以戀軒思幄。策蹇磨鉛。畢命爲期。在公無倦。但緣攝生罕妙。從役久勤。齒髮旣衰。精神亦耗。少私寡欲。敢言君子者乎。多病愛閒。方謂古人是也。智力不可強進。寵章不可濫行。實覺妨賢。只宜求退。今者肅清鳳闕。撲滅梟巢。囊弓矢以銷兵。永除戎備。垂衣裳而致理。廣任賢才。如某者。寒灰罷燃。智井誰顧。往歲之南征北伐。雖忝當仁。此時之尸祿素餐。逾慙非據。旣失行驅十乘。豈能臥護六軍。輒貢表章。懇辭爵位。伏惟軍容察以有犯無隱之義。難進易退之規。仰贊帝俞。俯從愚願。敢有脅肩諂笑。固無沒齒怨言。幸逢四海之昇平。願指一邱而養老。干黷清德。兢惕實深。伏惟云云。

都統王令公賀冬

伏以律管潛吹。星躔改候。觀臺望瑞。雲物呈祥。伏惟令公每布祥雲。常懸愛日。三軍殲弩。挾楚續以忘寒。五夜枕戈。擁孫衾而達曙。必資景福。早建殊功。雅當肅殺之時。便遂討除之勢。四方聳耳。佇聆大捷之音。萬乘傾心。永致中興之運。某末由陳賀。但切禱祈。

浙西周寶司空

伏以禮慶履長。傳標視朔。夷夏契混同之運。乾坤叶交泰之期。伏惟司空相公。浙水流恩。吳山變俗。旣睹趙衰之日。永洽物情。願親傳說之星。早環帝座。末由拜賀。但切禱祈。云云。

前宣歙裴虔餘尙書

伏以禮稱迎日。傳載書雲。當寰中賀聖之辰。是水外寢兵之際。宜陳善祝。仰薦殊祥。伏惟尙書。政報褰帷。慶資溫席。已捧徵黃之詔。固諧夢說之期。人仰板輿。羨老萊之榮養。帝留金鼎。待伊尹之來調。某雖戎律拘身。而清規在想。末由拜賀。但切禱祈。

幽州李可舉太保

碾玉排方腰帶一條。並金魚袋一枚。金花銀合盛。重一百六十兩。

右件腰帶。體資廉潤。功就豚磨。雖慙鄂坂之金。稍勝延陵之綺。珪璋比德。宜親佩劍之腰。霜雪呈華。願近生松之腹。動則金章躍鯉。靜乃寶匣盤龍。既當屈以求伸。唯望服之無斃。謹專寄獻。遠表依攀。伏惟恩私特垂檢納。

銀結條燈籠一枚。承燈蓋白盛荷葉一。漆木匣盛金銅鑲鑲全。

金花平脫銀裝硯臺一具。盛。垂銅香臺五枚。漆木匣盛。金銅鑲鑲全具。

金花平脫銀裝硯匣。並硯几一具。銀硯水瓶等四事。硯几在第二畝內。

右伏以待異物而奉異人。嘗聆新語。覽遠書而愧遠客。亦驗古詩。志常切於攀鴻。事不慙於獻鵠。每逢珍玩。則繫懇誠。前件燈籠硯臺等。鑄鑠成功。披砂潤色。運巧而靈絲綴藻。標奇而霞縹雕華。高懸謂雲蓋凌風。遙視疑露盤含日。龍膏豹髓。偏宜卜夜於歡筵。鳳筆鵝牋。亦可依仁於末席。加以謝囊分掛。孔硯深藏。虛心而只待含香。蘊器而終能處默。是敢徵美言於舉燭。寄微慊於濡毫。伏惟無思宋殿葛籠。癖敦儉約。

或逞張池草聖。許近恩輝。必可遠耀九光。深滋五色。隔飛蛾而救物。仁化彌彰。研含麝以傳書。德馨增馥。非無所採。粗有可觀。必望眷私。俯垂容納。幸甚云云。

金花陷銀柘裏合大小共三具。

銀接頭紅牙匙一十對。

犀杓子四隻。已上大合內盛。銀裝茶碗四隻。在中合內盛。

犀櫟子二十片。在小合內盛。金花銀腳螺杯一隻。

右件匙筯犀合茶碗螺杯等。雖愧金盤粗勝棘匕。鈿玫瑰之表異。固讓魏銘。詠玳瑁之標奇。敢徵潘賦。所貴者。煙排翠點。霞染纖條。掌握增榮。不慮劉使君見失。指蹤任意。或希柳御史自攜。況乃水族殊姿。天成雅器。永免蜘蛛寄跡。能將鸚鵡齊名。稍謂珍奇。遠思寄獻。伏惟靜籌帷幄。許接樽罍。對郭隗於高臺。深傾露液。遣甘需於仙闕。勝醉霞漿。伏惟恩私。特賜檢納。幸甚云云。

織成紅錦繡壁兩條。暖子錦三匹。

被錦兩匹。西川羅夾縵二十四匹。

真紅地絹夾縵八十匹。

右件繡壁錦縵等。龜城傳樣。鳳杼成功。張廣幅而宛見虹舒。疊綵繒而免慙蛟織。雖五千里之誇步障。則難可爭光。而四匹之製戎衣。則或堪入用。亦冀備會稽守書行之服。換平津侯夜寐之衾。不咎輕微。特

垂容納于浼斯甚。兢慙實多云云。

安南開海路圖一面。

西川羅城圖一面。並八幅紫綾綠。

右竊以事畏人知。功慙自銜。孟側奔殿。終著美於魯論。卻至驟稱。果興譏於晉乘。妍蚩可鑑。今古何殊。頃者銅柱南標。金墉西建。開八百里之險路。則雲將驅石。雷師劈山。築四十里之新城。則水神滲泉。地媼供土。蓋乃感忠誠於上鑑。標壯觀於外藩。敢言簡在帝心。實匪率由人力。今則八蠻歸化。萬乘省方。既能有備無虞。亦所當仁不讓。去年嘗傳雅旨。欲覽微功。乃徵於墨妙筆精。遍寫彼長途峻壘。宛如縮地。不止移山。遠遣寄呈。略希展閱。必謂桂陽衛颯。誠瑣瑣焉。亦知蜀國張儀。是區區者。恃深眷而不拘小節。激壯圖而無訝大言。伏惟云云。

徐泗時司空

右伏以縞帶紵衣。魯史乃先其所出。投桃報李。周詩用表於相知。永言沼沚之毛。豈讓琅玕之寶。蓋防闕禮。只貴申誠。前件物等。雖曰土宜。亦由波及。實慙華麗。況至尠微。難把八行。盡寫傳心之語。唯憑一介。聊陳藉手之儀。伏惟眷私。特賜檢納。云云。

田令孜軍容送器物

右竊以氣賸未銷。道途尙梗。久乖專信。略達微誠。每憂於遠莫致之。不敢以多爲貴者。前件器物。貨非難

得器實易盈。雖慙鏐銑之名。願接樽壘之列。輒將寄獻。遠表依攀。伏望無掛意於四知。幸流恩於一諾。特垂容納云云。

振武赫連鐸尙書謝馬狗

右特蒙眷知。遠有惠賚。無庾亮的顧之害。有陸機黃耳之能。敢謂備於左牽右牽。實爲馴於執勒執縶。寧唯致遠。況解防姦。旣驅策之有期。固指蹤而無失。仰承重貺。倍荷殊私。末由報酬。益多愧悚。伏惟云云。

幽州李可舉大王

青氍帳一口。金銅裝鉸具。

右伏蒙恩私。特賜惠賚。委之專介。衛以壯夫。遙陟危途。得張官舍。不假棟梁交構。能令戶牖全開。出觀則一朵蓮峯。入玩則千重錦浪。加以頂標曉日。額展晨霞。靜吟而筠箔搖風。俯視而地衣鋪雪。舒卷皆成其壯觀。行藏永佩於深仁。莫不銜沙漠之奇模。駭江淮之衆聽。臥龍竊譽。固當高枕無憂。虜豹成功。必可運籌決勝。唯期尅捷。全賴庇庥。荷戴所深。啓陳何及。伏惟云云。

桂苑筆耕集卷十一

唐高麗都統巡官侍御史內供奉崔致遠撰

檄書四首

檄黃巢書

招趙璋書

告報諸道徵會軍兵書

告報諸道徵促綱運書

書六首

答浙西周司空書

答江西王尚書書

答徐州時溥書

答襄陽郝將軍書

浙西周寶司空書

浙西護軍焦將軍書

檄黃巢書

廣明二年七月八日。諸道都統檢校太尉某。告黃巢。夫守正修常曰道。臨危制變曰權。智者成之於順時。愚者敗之於逆理。然則雖百年繫命。生死難期。而萬事主心。是非可辨。今我以王師。則有征無戰。軍政則先惠後誅。將期尅復上京。固且敷陳大信。敬承善論。用戢奸謀。且汝素是遐眈。驟爲勁敵。偶因乘勢。輒敢亂常。遂乃包藏禍心。竊弄神器。侵凌城闕。穢黷宮闈。旣當罪極滔天。必見敗深塗地。噫。唐虞已降。苗扈弗賓。無良無賴之徒。不義不忠之輩。爾曹所作。何代而無。遠則有劉曜王敦。覬覦晉室。近則有祿山朱泚。吠噪皇家。彼皆或手握強兵。或身居重任。叱咤則雷奔電走。喧呼則霧塞煙橫。然猶暫逞奸圖。終殲醜類。日輪闊輾。豈縱妖氛。天網高懸。必除兇族。況汝出自閭閻之末。起於隴畝之間。以焚劫爲良謀。以殺傷爲急務。有大憝可以擢髮。無小善可以贖身。不唯天下之人。皆思顯戮。抑亦地中之鬼。已議陰誅。縱饒假氣遊魂。早合亡神奪魄。凡爲人事。莫若自知。吾不妄言。汝須審聽。比者我國家德深含垢。恩重棄瑕。授爾節旄。寄爾方鎮。爾猶自揚鳩毒。不斂梟聲。動則齧人行。唯吠主。乃至身負元化。兵纏紫微。公侯則奔竄危途。警蹕則巡遊遠地。不能早歸德義。但養頑兇。斯則聖上於汝有赦罪之恩。汝則於國有辜恩之罪。必當死亡無日。何不畏懼於天。況周鼎非發問之端。漢宮豈偷安之所。不知爾意。終欲奚爲。汝不聽乎。道德經云。飄風不終朝。驟雨不終日。天地尙不能久。而況於人乎。又不聽乎。春秋傳曰。天之假助不善。非祚之也。厚其凶惡而降之罰。今汝藏奸匿暴。惡積禍盈。危以自安。迷以不復。所謂燕巢幕上。漫恣鴛飛。魚戲鼎中。卽看

焦爛。我緝熙雄略。糾合諸軍。猛將雲飛。勇士雨集。高旌大旆。圍將楚塞之風。戰艦樓船。塞斷吳江之浪。陶太尉銳於破敵。楊司空嚴可稱神。旁眺八維。橫行萬里。既謂廣張烈火。爇彼鴻毛。何殊高舉泰山。壓其烏卵。卽日金神御節。水伯迎師。商風助肅殺之威。晨露滌昏煩之氣。波濤既息。道路卽通。當解纜於石頭。孫權後殿。佇落帆於峴首。杜預前驅。收復京都。尅期旬朔。但以好生惡殺。上帝深仁。屈法申恩。大朝令典。討官賊者。不懷私忿。諭迷途者。固在直言。飛吾折簡之詞。解爾倒懸之急。汝其無成膠柱。早學見機。善自爲謀。過而能改。若願分茅列土。開國承家。免身首之橫分。得功名之卓立。無取信於面友。可傳榮於耳孫。此非兒女子所知。實乃大丈夫之事。早須相報。無用見疑。我命戴皇天。信資白水。必須言發響應。不可恩多怨深。或者狂走所牽。酣眠未寤。猶將拒轍。固欲守株。則乃批熊拉豹之師。一麾撲滅。烏合鴟張之衆。四散分飛。身爲齊斧之膏。骨作戎車之粉。妻兒被戮。宗族見誅。想當燃腹之時。必恐噬臍不及。爾須酌量進退。分別否臧。與其叛而滅亡。曷若順而榮貴。但所望者。必能致之。勉尋壯士之規。立期豹變。無執愚夫之慮。坐守狐疑。某告。

招趙璋書

都統太尉騎問趙璋。古人有言曰。大廈成而燕雀相賀。湯沐具而蟻蚋相弔。審其賀之與弔。由彼依之與違。且爾同惡相成。異謀斯構。遽爲犯順。尙敢偷安。今我水陸徵軍。天人助信。久審風雲之會。遠揚雷電之威。卽當行展豹韜。立擒梟帥。尅收城闕。靜剗煙塵。想計爾曹。具知吾意。但以先春而後秋者。天之道。重賞

而輕罰者。君之恩。遂乃馳吾咫尺之書。問爾方寸之事。爾等依憑大慙。猾亂中朝。罪已貫盈。理須誅翦。然若黃巢狠性能改。雄心自新。望其國封。建彼家社。勲業可超。今邁古。恩榮可付。子傳孫。必爲致之。速相報也。如或螳螂努臂。螳螂磨牙。輒欲拒張。必當撲滅。爾須詳審至理。勸誘元寬。欲令天下知名。早申忠節。奈何草間求活。終作叛徒。況居成算之中。卽在覆巢之下。死生有命。禍福無門。唯審是非。可知成敗。所謂燕雀相賀。蟣蝨相弔。實在於知與不知。順與不順。良時易失。嘉會難逢。生爲有害之人。死作無知之鬼。深可耻也。深可痛也。勉唯去就。早副指蹤。悉之。

告報諸道徵會軍兵書

中和二年五月十二日。具銜某。謹告某州府節度使。逆賊黃巢。自亂天常。亟移星律。縱使擢其賈髮。詰罪難窮。未能春彼狄喉。稔奸斯極。神誅可俟。鬼怪何憑。而敢鴟張鳳城。熊據龍闕。至於五尺童子。猶欲請纓。況在四方諸侯。忍爲投袂。偶屬朝廷。密施廣晝。先倚旬侯。不勞十道徵驅。必謂一毫蕩定。豈料軍令雖殊。於兒戲。將名莫驗。於童謠。未暇舉旗。旋聆反旆。遂使犬猶狂吠。猿不驚號。徒招翫寇之譏。孰擅弭兵之譽。聖上覽飛日馭。親省風謠。蔭暘行恩。睿慮則雖勞罪已。慕羶結望。羣情則卻怨後子。然而自幸龜城。久停鑾輅。秦雲遠隔。蜀柳再芳。每興霜露之懷。聖情可想。未滅煙塵之患。臣節何安。某去年羽檄先馳。牙璋後舉。唱義聲於遐邇。養勇氣於偏裨。於是廣徵陶侃之船。久握辛毗之鉞。畫鷁齊飛於雪浪。檣烏高轉於煙空。必欲帆張曉風。旗侵夜月。纔離楚岸。便到漢江。直驅背水之師。永破滔天之孽。而乃未施豹略。頻降鳳

書已知諸道進軍。不許遠藩離任。詔旨云。爲朕全吳越之地。遣朕無東南之憂。是以再閱綸音。遂回組甲。蓋乃仰遵帝命。固非敢緩師期。今則萬里專征。誰能奮翼。三年縱敵。尙許磨牙。賊巢雖戲鼎中。已居機上。掘尾狗子。輒曾發狂。斷頭將軍。難可釋怒。某幸忝握兵之要。固當仗義而行。近奉詔條。遍徵戎旅。一呼巡屬。四集驍雄。不唯被練三千。實有控弦十萬。已取今月十八日。部領兵士。發離本鎮。必得直趨汴道。徑入潼關。立刻梟巢。去迎鑾駕。引舜風之無外。覩漢日之再中。況都統王令公。暗運智機。別操戎柄。已提勁卒。卽展奇功。足可相應軍謀。共興王略。諸道自從賊盛。皆峻官榮。況爲食土之毛。盡思効命。矧乃荷天之寵。豈合安身。且大丈夫之在世也。壯氣難申。良時易夫。苟或美事。讓他人之手。殊恩負聖主之心。則莫測肺肝。何施面目。固應各勤訓練。同願誅鋤。瞻帝輦而魂飛。擁戎軒而眦裂。早看行色。勿懷兒女之悲。須把戰勳。永作子孫之福。謹告。

告報諸道徵促綱運書

謹告某州節度使。夫忠於國者。無以家爲。是故漢代微臣。有傾產助邊之請。魏朝烈士。有舉宗陳力之言。況乃邊寄榮身。兵符在手。遇大朝之多難。見上宰之董戎。而不能役致泛舟。令行挈畚。使戰士猶多饑色。將軍未獻捷書。但忝分憂。實爲忍耻。某昨從中夏。再集大軍。不慙素飽之名。已警無譁之衆。仍差都押衙韓汶。先賚金帛百萬匹。救接都統令公軍前。旣裝運船。將扣飛檣。言遵汴道。徑指圃田。乃值徐戎。來侵淮口。扼斷河路。攻圍郡城。近者又擁寇徒。直衝近境。敢憑蜩結。欲恣鯨吞。當道旣見阻難。暫須停駐。遂乃揀

徵驍勇往討頑寇。佇靜封疆。便登道路。必可豁通綱運。廣備供輸。行稱東道主人。非無意也。立斬南陽太守。竊有志焉。諸道久荷深恩。各居重任。縱以家門寶貨。猶合瞻軍。況將州縣賦輿。豈宜壅利。其宣武。忠武。天平。昭義。秦寧。平虜。河陽等道。盡發雄師。咸從統命。共依饋運。各已通流。其浙東。浙西。宣州。江西。鄂州。荆南。湖南。嶺南。福建等道。今欲踰年。未聆發運。若由水路。須入汴河。如此稽留。何因濟集。必計杜畿美化。遍得人心。任峻奇謀。兼施兵力。速請同勤饋輿。繼發綱船。齊至都統軍前。早期收復京闕。其徐州實爲國蠹。豈止隣讎。蓋以天暫容奸。地猶聚慝。昔爲龐助叛亂。早合瀦宮。昨因時溥猖狂。更宜塗地。偶屬朝廷。未誅大慝。不問小瑕。貴悅軍情。驟加爵賞。而乃時溥罔遵詔旨。尙搆奸謀。去年曾犯淮山。令夏又侵泗水。乃作黃巢外應。久妨諸道進軍。先須剗當路之豺狼。後可殄壞堤之螻蟻。冀使隋皇新路。楊柳含春。無令漢祖舊鄉。荆榛撲地。凡承寵寄。共察忠誠。謹告。

答浙西周司空書

某白。忽覽來示。驚憤兩深。是何見事之乖。如此發言之過。且趙公約者。背軍逃走。行怙追擒。遽投跡於貴藩。遂偷生於逋藪。今則異端斯搆。細作爲名。若能懷上士之心。豈可信下人之口。譚何容易。事不酌量。來示云。位極上公。權專都統。別興異見。遽起他謀。以何悔尤。欲爲燒劫。此乃稍殊雅責。僅涉穢詞。鼠尙有皮。蓋譏無禮。駟難及舌。亦戒愼言。豈是不爲慮兮。誠非所可道也。司空晚歲。縱不以學識爲長。從事雋才。亦合以智謀相贊。虛成啗飯。難望和羹。未論是非。須陳本末。具標五信。無貯一疑。且此三世立功。無非報國。

四方出鎮。曾不安家。身持將相之權。手握恩威之柄。豈獨撫淮邊之俗。終期安海內之人。方切輯綏。何言侵伐。其可信而不合疑者一也。況今黃巾尙熾。翠輦未歸。方驅貔虎之師。欲破豺狼之窟。遠離弊鎮。深託善鄰。臨危而猶冀依憑。守靜而更除損害。其可信而不合疑者二也。司空早聯中外。永保初終。言既馥於芝蘭。操彌貞於松桂。曾無罅隙。每有音書。偏深魯衛之情。永絕張陳之事。其可信而不合疑者三也。浙西始爲交代。未得多時。陶公之官柳誰移。召伯之遺棠不讓。至於賊壘。猶將信義招行。況是舊藩。豈以兵戎侵逼。其可信而不合疑者四也。昨自師過江浦。令肅雪霜。軍門則擊柝夜嚴。行路則銜枚晝靜。豈有任從海則登舫。趙公約則隔簾。通報既不難爲。指麾又何易得。直至上流嘉客。不暇接迎。是何下等健兒。敢來親近。其可信而不合疑者五也。粗申大較。可察中心。何乃憑叛卒之讒詞。失賢人之事體。以此陳奏聖主。以此傳告諸侯。非我無詞。是誰有過。細審來旨。莫測貴懷。爲當老耄所侵。末年多變。爲復狂迷偶作。忠節遽乖。夫耳不辨五聲。目不分五采。曰昧司空久當重寄。已謂元臣。因何妄發莠言。或似自懷蓬性。不知彭寵此時有按劍之疑。卻恐廉頗他日無負荊之處。噫。將帥則空榮列土。君王則尙遠蒙塵。更無匡復之誠。唯有猜嫌之事。祇隔一條水脈。便興萬種風言。必計心虛。遂成口實。大凡獻酬以禮。來往爲書。理失其中。事生非小。且須審諦。勿恣豪強。於此難盡私誠。其他備載公牒。無遺後悔。併棄前功。某白。

答江西王尙書書

十二月六日。某白。閣下遠損長書。深貽善諭。一覽而發皇耳目。再窺而驚越神魂。是何詞彩之彬彬。能致

言端之懇懇。既知約我以禮。方信起予者商。況乃事徵於美里。聖人道媿於首陽。義士切磋雖至。刻畫何勝。敬佩良箴。專銘鄙抱。然慮虛聲易應。眞寶難知。弄脣吻以鑠金。衆皆妙手。拭腫眸而辨玉。多是清盲。苟非原始要終。則必唱予和汝。是以略陳梗槩。用察根源。匪欲廣援古今。所希暫曉左右。僅同伐善。豈免興慙。君其審之。僕所望也。僕與浙帥周司空。早於鳳里相識。亦爲鵠原往還。接載笑載言之時。展如兄如弟之分。況作建旟交代。眞爲結綬相知。既睦比鄰。罷局外戶。江南江北。祇鬪行春。三楚三吳。盡喧來暮。方謂憑我友歲寒之節。解吾君宵旰之憂。豈料蒼鳥高飛。翠華遠狩。僕以久叨重寄。便決專征。偶緣兵力未加。人心尙懼。遂於春首。先發羽書。仍請都統判官顧雲協律。議共成之事。謀相見之期。固非閱被廬之軍。徵夾谷之會。實欲親謀敵血。方寫痛心。若能接濟師徒。粗得振揚聲勢。而乃周司空卻自棄同。卽異。不能捨短從長。忽疑惑於澠池。謂矜誇於踐土。便見戒嚴城壁。阻塞津途。搆猜嫌而信有小人。遺故舊而曾無大過。僕雖逢彼怒。但守吾眞。及至中夏出軍。外方多事。冀安弊鎮。旁倚近鄰。又令幕客過江。請爲都統副使。豈銜弓旗之禮。邀辟元戎。祇憑鉄鉞之威。撫綏近境。周司空確乎阻意。莞爾興譏。不從固請之言。自惜有餘之刃。頓移曩顧。但積沈猜。見此初屯下瀨之師。未設中流之誓。猶淹水道。久候天風。軍聲旣振於四鄰。人意自防於兩岸。偶有背軍官健。趙公約者。走投浙西。釣以巧言。搆爲細作。便移長牒。妄說異端。其書云。位極上公。權專都統。別興異見。遽起他謀。以何悔尤。欲爲燒劫。僕以趙襄子之忍辱。念茲在茲。蘭相如之慎微。有始有卒。遂馳書牒。具述事情。聞司空尙發怨言。自懷忤色。與宣護景德貞。徐帥時溥者。暗資積釁。

相應密謀。各興梗路之兵戈。遍告沿江之郡邑。以至練成戰陣。鎖斷征途。僕若不辭險阻之虞。必致殺傷之患。坐甲而未期破竹。回車而用待負荆。尋屬繼奉絲綸。不令離鎮。遂驅組練。卻已班師。雖云帝命斯遵。實乃隣兵所阻。彼宣州者。亦有所因。春初寇犯黟州。勢侵句水。況值前廉已去。新帥未來。旣無禦捍之權。恐落奸宄之便。遂差押衙馮綬。暫令安撫郡城。蓋緣曾奉詔書。特許便宜從事。凡於制置。得以指麾。景虔貞常侍菽粟不分。蘭猶莫辨。謂言專輒。遽有侵凌。殺害軍人。劫掠財物。馮綬幾臨死所。劣得生還。自此隋國怨興。謝城信絕。將投彼鼠。其如有礙之時。欲償於豚。又是無端之事。且爲含忍。未及通和。必知橫被織羅。巧成貝錦。傳之於遠。誰曰不然。噫。滔滔者天下皆同。君子所恥。泛泛如水中自樂。壯夫不爲。但問事之若何。則知曲之在彼。今則特垂教督。益驗獎憐。自緣有理可申。豈便無辭以對。固非飾過。不敢憑虛。莊生不云乎。其智適足以知人之過。而不知其所以過。若非辱殷勤之旨。何以息睚眦之詞。僕也不能嫉惡如讎。唯以用和爲貴。但以賢愚共惑。本末未彰。復書而不覺詞繁。比事而終慙理短。身修三省。勉尋曾子之規。心敬一言。永荷伯陽之惠。幸垂鑑志。某頓首。

答徐州時溥書

六月十六日。某白。僕射足下。特辱長牒。仍移公牒。細詳來旨。頗涉多端。有同戲以前言。無乃驚於衆聽。雖倚兵強力壯。其如作僞心勞。且泗水舊隸仁封。新標使額。固非郡守專輒。蓋是朝廷指揮。爲在頃年。獨全忠節。遂編名於防禦。永傳賞於驍雄。近者久結隣讎。蓋遵國典。獨行直道。固守危城。嘗膽爭先。斷頭非苦。

此亦古人云。寧爲忠鬼。不作叛臣之義也。況于尙書。有定國恩威。有栗碑武勇。自安疲俗。甚洽羣情。每將句踐單醪。均沾無黨。不獨臧洪薄粥。分啜有餘。固當散三年之儲。充一日之費。寡能敵衆。安可待勞。豈比於築室反耕。杜門卻掃者哉。忽覩來示云。泗州獨阻淮河。自牢城壘。使四方多阻。諸道莫通。而又每於朝廷。妄爲訕謗。今有城中將校。潛來計圖。請少振兵戎。即便期開。秦者大凡人事。莫若自知。足下去年。忍雋不禁。求榮頗切。暫奮橫行之氣。果成順守之權。是以累受國恩。遠膺藩寄。豈可尊身忽物。是已非人。偏致嫌於蘭生。終歸過於季氏。其於淮河久阻。道路不通。皆因貴府出兵。不是泗濱爲梗。是非可辨。遠近所聆。去歲夏初。早蒙侵伐。呼蟻軍於漣水。拒虎旅於淮山。此緣將援親仁。難逃善戰。爰謀薄伐。用救倒懸。君異荀吳。莫振受降之譽。僕慙呂布。有虧解鬪之言。泗州以實奏陳。豈爲謗讟。僕也雖慙知己。嘗敢薦賢。亦曾錄詔寄呈。必合垂情見悉。誰料既踰望始。翻起釁端。甲兵繼興。疆場頻駭。所云泗州城中將校。頻來計圖。此乃巧飾虛辭。通行長牒。盡知謫詭。孰肯詭隨。朝廷以足下身處雄城。刃多餘地。委催綱運。冀濟權宜。但自戢斂兵車。必得流通饋餉。今則卻云。奉朝廷意旨。收徐泗封疆。廣出師徒。難窮事意。必若足下訓戎勇銳。報主忠勤。何不親總全軍。往殲巨憝。早立非常之效。以酬不次之恩。而乃知僕再次西征。卽謀北渡。便侵泗境。來犯淮壩。負國家之寵榮。搆州縣之患害。幸其賊勢。阻此師期。未諭雅懷。何辜聖獎。言但繁於枝葉。事莫究於根源。來示又云。此皆廬州海州。皆爲背叛。累來投款。不遺措詞者。強謂恩情。形於書札。顏雖不厚。心且何安。彼東海廬江。偶聚奸惡。異端斯起。既非鄭有人焉。同氣相求。盡是跖之徒也。足下已居重

任不徇危謀。自守詔條。何煩飾說。僕累將軍食。頻救臨淮。爲分順逆之蹤。令保始終之志。實以泗州。曾非杞子之無禮。亦類展禽之有詞。每當告急告窮。唯以行仁行義。唯望足下。暫息餘怒。深量遠圖。且先報國之誠。無急伐隣之役。兼觀詔書獎諭。請與忠武協和。足見睿情。俾銷微憾。在於臣子。合更慎思。求將安撫。氓黎。速自追迴士卒。苟或上負君命。下違物情。隔礙征途。侵凌近境。則亦難辭借一用試當千。必見傷禽易驚。困獸猶鬪。悔須防後。險已居前。矧乃泗州。以抱節爲名。貴鎮以翫兵爲務。泗州則唯遵王化。貴鎮則虛構牒詞。以較否臧。可知曲直。是敢遠申忠告。冀絕後誣。正當聖主蒙塵。未除禍難。何忍諸侯列士。更起兵戎。猛發忠言。懶爲諂笑。勉思大體。勿暴小瑕。必因此日所箴。卻得後時見謝。幸從誠信。無損功名。某官某頓首。

答襄陽鄆將軍書

中和二年七月四日。具銜高某。謹復書於將軍閣下。某側窺前史。嘗慕古賢。贈人以至言。則老聃垂誠。成我者良友。則管仲知恩。但恨季俗寢訛。芳規僅喪。豈期今日。得覩餘風。將軍唯恐掩瑜。欲令磨玷。特勞彩翰。遠辱長牋。初尋歸美之獎詞。汗驚浹背。後覽扶危之箴諭。淚迸沾頤。旣乃粲然可觀。焉敢率爾而對。輒憑毫素。仰疏血誠。終冀恩私。略垂採覽。幸甚幸甚。某自去年春。知寇侵秦甸。帝幸蜀川。欲會兵於大梁。遂傳檄於外鎮。練成軍伍。選定行期。便被武寧。忽興戎役。先侵泗境。後犯淮壩。聲言則狼顧舊封。實意則鯨吞弊鎮。長驅猛陣。直犯近疆。是以分遣偏裨。果殲克醜。及當中夏。乃出大軍。旣知其北路阻艱。遂決於西。

征利涉。尋奉詔旨云。卿手下甲兵數少。眼前防慮處多。但保淮南之封疆。協和浙右之師旅。爲朕全吳越之地。遣朕無東南之憂。言其垂功。固亦不朽。某以兵機固難自滯。君命有所不從。已事征行。必期進發。占風選日。只欲奮飛。又奉七月十一日詔旨云。諸道師徒四面攻討。計度收尅。旦夕可期。卿宜式遏寇戎。饋輦粟帛。何必離任。則是勤王。或恐餘孽遁逃。最要先事布置。以此再承綸旨。遂註舟師。唯廣利權。宜供戎費。殊不知無虧進退。唯命是從。卻被近鎮譏誣。聖朝猜慮。食駃騠之良肉。何敢望焉。絆騏驥之駿蹄。無能爲也。遂使忠誠未展。睿獎難期。非敢自辜海內之人心。但養淮邊之兵力。詢之於理。良有所因。將軍以泗州舊屬彭門。謂某妄爲占護。必慮未詳狡計。或採浮詞。且徐州昨自僞張。更無戢斂。威權旣盛。暴虐轉深。見某自五月初。再謀征討。已排勁卒。欲援令公。兼差都押衙韓汝。先賫一百萬貫。救濟都統軍前。盡載舟船。將臨道路。又與兵甲來擾疆陲。把斷淮河。簇成寨柵。是以行計猶阻。羣情莫安。細察徐州所爲。是作黃巢外應。不然則何以每見當軍臨發。卽將兗黨奔衝。又乃執稱泗濱。阻絕汴路。且臨淮則城孤氣寡。劣保疲羸。彭門則地險兵強。恐行狂悖。以茲斟酌。可見端倪。況無諸道綱船。曾過泗州本路。今則皆因此寇。卻滯諸綱。近則浙東浙西。遠則容府廣府。並未聆饋運。何濟急難。某見簇楚師。俾誅餘孽。一則遵行詔旨。救援鄰封。二則得靜長淮。欲登征路。固非貪泗民之租稅。排徐帥之兵戎。蓋分曲直之端。將保初終之節。泗州二年閉壘。一境絕煙。織婦停梭。耕夫釋耒。滿城軍食。猶仰給於弊藩。閩郡賦輿。固難徵於疲俗。將軍謂某藉其地利。搆此鄰讎。細閱來言。難知深意。泗州不獨咸通之際。得振雄聲。曾於天寶之中。亦遵直道。況

于濤尚書政條既舉武略兼精收百姓之歡心得三軍之死力將軍便令棄而不問理復如何徐州實有大憊固非小患若將助虐豈謂輸忠某今所俟者戮當道之豺狼奮乘秋之鷙鷃星言夙邁電擊專征必與王令公腹心見知首尾相應齊驅蛇陣豁展豹韜尅復上京奉迎大駕亦不敢負秣陵之節度爭強弩之功名所冀得繼前勞自防後患使蘭相如之謙德不損雄威費無極之讒徒皆歸顯戮捨此之外餘無所云敬佩良箴豈離愚抱伏惟鑑察某再拜

浙西周寶司空書

昨奉公牒云當道臨淮叛卒過江來投集衆廣場已受降訖三復來示言雖不酬且降之爲名其理甚大虞舜之七旬苗格晉侯之三日原歸此皆以干紀亂常起兵動衆緩之則稔成患害急之則橫致殺傷遂假小慈終施大信能敷德化俾革奸宄若有偶聚萑蒲散爲榛梗者共須撲滅勿使晏安今相公幸此隣灾樂其軍禍莫能嫉惡翻欲惠奸恐乖仗鉞之威虛銜倒戈之捷且如去年陳儒徒伴唐突貴鎮封疆僅有六萬餘人宣州日告危急此時相公何不招諭致令侵凌卻見瑣瑣頑寇卽自勤勤誘引莫測高旨實辜衆心傳不云乎召缺外盜書不云乎爲逋逃主稍詳至理無信虛詞昔漢朝匈奴叛黨來附景帝使欲與之封周亞夫曰彼背其主而見賞何以責人臣之節以小喻大可量事情況臨淮一郡早從淝上行營及淮邊戰敵每有優賞曾無偏頗自是臨財則競起貪心遇賊則皆無鬪志旋爲逗撓猶與矜寬昨又請換都頭已依衆請殊不知犬易與於狂狷豕難制於喧脞未盡誅擒便謀奔竄幸且未離近境固合同塞

奸源在此。既已不忠。於彼亦應非利。石祁子所云。天下之惡一也。惡於宋而保於我。保之何補。其在茲乎。況凡鄰府事宜。一彼一此。互相救援。同致安寧。是以前年六月中。貴鎮有天平潞府。元從兵士背叛奔逃。數僅百人。爲患非小。遂蒙移牒。請爲追擒。當使羌都將梁楚。部領馬軍。所在討襲。並各帖管內諸州。令差精兵。同力捕逐。尋卽諸鎮。及東塘遊奕使。相次收獲三十八人。纔見擒來。便令押送。續得梁楚狀報。到濠州界。趕及殘孽。殺得三十餘人。其餘漏網之徒。盡以傷弓而走。所生擒之兇黨。皆就戮於貴藩。能致彼之快心。實賴此之勞力。今則卻見臨淮叛卒。特向沿江招呼。便稱受降。仍缺補職。累牒咨請。不送過江。蒐照何多。養奸斯甚。敢言以怨報德。實恐在安忘危。詩云。投我以木瓜。報之以瓊琚。匪報也。永以爲好。此乃國風遺訓。昭晰可觀。相公通人。略賜詳度。無自賈天下之讟笑也。其他已具迴牒。伏惟俯賜照察。

浙西護軍焦將軍書

昨有臨淮背叛兵士。誅擒不盡。奔逃過江。便蒙貴鎮相公。特許歸降。遍加補署。兼移公牒。頗構虛詞。既乖七縱之謀。誰謂三驅之禮。蓋是幸災樂禍。固非撫土安人。自古受降之爲義也。叛而伐之。服而捨之。忠信能敷。德刑乃就。或以賊數則動盈千萬。奸謀則難測二三。若欲戰爭。恐多傷殺。或吹笳感動。或書箭招呼。免致膏鋒。俾從肉袒。其或最爾寬狹。率然叛離。免奔岡而終必自顛。鼠失穴而將欲安往。在於接境。合與同擒。不料豁開伴。免之門。深作遁逃之藪。慰安螻蟻。雖欲好生。訓練熊羆。有何用處。纔招稔惡之輩。遽銜受降之名。蘊豹韜而略不弛張。對龍節而恐須慙愧。魯史云。晉楚設誓。無相加戎。同卹災危。備救凶患。若

有害楚。則晉伐之。在晉。楚亦如之。交贄往來。道路無壅。謀其不協。而討不庭。此則古時敵國。猶保話言。今日善鄰。豈傷師律。況晉楚則各在遠地。揚潤則只隔長江。曾無交惡之端。豈有相欺之事。實驚衆聽。甚爽遠圖。已無蠶女爭桑。永安兩境。宜效農夫去草。靜剗本根。伏惟將軍。遠護兵符。共成王事。必不欲和之如響。知而不言。唯望稍致良箴。終除巨弊。永使必誠必信。誰云莫往莫來。此旣無噂嚅以背憎。彼亦免忸怩於顏厚。幸垂採聽。特惠終始。伏惟云云。

桂苑筆耕集卷十二

委曲二十首

滁州許勅

昭義成璘

廬江縣令李清

淮口鎮李質

光州李罕之

楚壽兩州防秋迴戈將士

歸順軍孫端

楚州張雄

楚州張義府

滁州許勅

壽州張翺

廬州楊行敏

和州秦彥

盧傳

戴盧

光州王緒

楚州營田判官綦母蘋

鄆州耿元審

海陵鎮高霸

淮口李質

滁州許勅

報許勅得狀知妻劉氏將從征討願效勤勞嘉尚之懷諭言不及吾嘗覽後魏書見楊大眼者武伎絕倫戰功居最其妻潘氏頗善騎射至於攻戰遊獵之際潘亦戎裝齊鑣並驅及至還營同坐幕下對諸寮佐笑言自得大眼時指諸人曰此潘將軍也吾思見若人爲日已久不期今夕得舉妙才此亦可謂劉將軍矣想鼓鼙方振琴瑟相隨旣在同心可知竭力教戰則必欺孫武解圍則可假陳平勉致殊功卽行懋賞悉之不具云云

昭義成璘

報成璘大夫。魯史云：臣一主二漢。書曰：一心可以事百君。則知下有離心。蓋爲上無全德。姪孫僕射。夙虧家訓。驟荷國恩。累忝藩方。曾微績効。每於撫俗。略不隨時。恩威豈得並行。寬猛無由相濟。況近關西之賊窟。持山北之兵權。戰伐旣勞。輯綏莫至。固知軍情潰散。物議喧張。大夫名旣超倫。事能從衆。息貔貅之憤怒。慰黎庶之疲羸。實謂有三雋才。誰云犯五不韙。古之所有。今也何疑。遠遣專人。迎取家口。儻或行程齟齬。且令彼處婆娑。如能斷送出來。便與支持發遣。一蹶墜屨。猶能牽念舊之心。百口孤孀。何忍見含愁之色。必應慰暖。免至饑寒。倚望所多。諭言無及。彼但勤修政理。佇荷寵榮。不令外盜侵凌。必見大君委寄。冬寒慎爲將息。節級各與安存。悉之。

廬江縣令李清

報李令。昔有桓榮祖者。少曾學武。或曰何不學書。答云。上馬橫槊。下馬談經。方可謂不負飲食矣。若無自全之伎。何異於犬羊乎。昨見所申。衆情可獎。昔也一百里之疲俗。託在神君。今則十八砦之義兵。請爲軍帥。若非寬將猛濟。惠與威行。則何以鯁蛇懷仁。各能遂性。熊羆聚黨。盡得降心。姑拋堂上之琴。便握匣中之劍。所謂文一變而至於武者也。況李令族聯天派。名比水源。才機爲一代之雄。心術乃萬人之敵。足得以指麾銳卒。掃蕩叛徒。不惟除郡邑之災。亦可定國家之難。然而軍務旣常。獨理職銜須有可稱。未見所求。固難抑致。爲復願兼知戎役。卻守縣曹。爲復欲改轍從知。乘機立事。察斯二者。決取一途。專期奏論。早與飛報。且如班超投筆。蒯恩捨芻。當池蛟得水之秋。有天驥追風之便。古詩云。寧爲百夫長。羞作一書生。

信知倜儻之人。懶守低徊之節。勉成勳業。永荷寵光。戎務方殷。善自將息。諸寨將士。各與慰問。悉之。

淮口鎮李質

報李質覽所申狀。慰愜良多。李再興未革狼心。敢張蜂目。構稱虛事。違負本軍。初憑逐寇之名。卻設起戎之計。賴質深懷智策。善審兵機。一唱義聲。四圍逆黨。狀疾風之掃危葉。如烈火之蕪飛蓬。再興將見誅夷。果當懾竄。然既是傷弓之物。必爲釁鼓之資。兼知質男裕。黃口小兒。血氣未定。偶虧嚴父之訓。以涉叛夫之謀。質又徇公絕私。捨曲取直。愛而知惡。義而滅親。削其舐犢之言。遵彼烹臯之理。若非忠勇。何得如斯。古語有之。蝮蛇在手。則壯士斷其節。是乃忍小痛而除大患也。況石碣傳芳於魯史。日磾載美於漢書。故事斯存。令名不朽。足以見質有大丈夫之氣。有真君子之心。權兵而動必成功。鎮境而靜能守節。前勞後效。日就月將。固當榮盛可期。勿以滯淹爲恨。勉安軍旅。善保勳名。以古況今。惟吾知汝。悉之。

光州李罕之

報李罕之。成覲有言。彼丈夫也。我丈夫也。然則成功立節。不獨古人。仗順輸忠。正當今日。近奉勅書手詔。無非激勵衆心。兼除王令公充都統。西門軍容充都監。此乃藩鎮功虧。朝廷計盡。遂將大任。專付老儒。雖漫傳聲。必難濟事。此去年齊驅猛銳。將掃頑兇。尋奉絲綸。俾安淮海。詔書云。爲朕全吳越之地。遣朕無東南之憂。遂乃旋師。不敢違命。然則詳審物議。參酌軍期。關中有執斧之徒。關外無枕戈之志。誰能竭力。實可痛心。吾若不行。衆將焉往。今欲直趨汴路。便入潼關。佇復鳳城。奉迎鑾駕。永使流傳萬代。終能肅靜四

方罕之已處分憂。久爲養勇。必欲揀精練銳。以期伐叛摧寇。今錄勅書手詔白寄往。仰窺聖旨。必勵忠誠。便決征行。共圖富貴。時不可失。吾子勉之。故此告知。速宜飛報。悉之。

楚壽兩州防秋迴戈將士

報王承問等。久勞防戍。又役戰征。知得遠歸。良多慰愜。詩稱束楚。不免怨思。傳載及瓜。亦膏憤恚。古之難事。今見忠誠。況承問限過三年。訓齊一旅。值國家之多難。息鄉井之懷歸。言下忘身。軍前効命。遂得永別。伍符之列。高登八座之榮。固知實勤。豈慮虛擲。且往年被練而去。今日衣錦而迴。孫權努力之言。已成顯驗。王昶寶身之誠。更慎操持。深秋遠行。善自將息。節級將士。遍與安存。遣此不具。

歸順軍孫端

報孫端。將軍自從歸投。久處閒散。想多鬱悒。不暫弭忘。但以端職秩已高。官資須稱。使司累具奏薦。朝廷則有指揮。且仰安撫師徒。佇迎恩命。古人貴其晚達。君子誠其速成。王化旣無偏無頗。寵章則盡善盡美。勉期守順。勿念躁求。秋晚其涼。切慎將息。節級遍與慰問。悉之。

楚州張雄

報張雄中丞得狀。知已點練兵士。兼請出軍西去。討逆賊徒。憤氣勃興。忠詞懇切。覽之嘉歎。深置於懷。且每值寇戎。稍侵疆圉。雄必心騰勇略。首唱義聲。去年已建殊功。今日又申丹請。不辭危於馬革。願展用於豹韜。實謂起予者雄。始可與言兵已矣。則帝委之以郡侯。吾待之以國士。永揚茂績。固在良時。然彼州司。

事力猶困。未可便謀征役。且宜更候指揮。兵士各與慰安。秋深善自將息。馳此不具。

楚州張義府

報張義府得狀兼送罰錢。引咎自責。足驗用心。古語有之。人誰無過。過而能改。善莫大焉。饋餼之儀。春秋所重。在於屬郡。豈可外交。勿爲饑則附人。別欲申於知己。將滅白圭之玷。遂以金作贖刑。細覽來詞。似懷他慮。膚受之愬。固不行焉。但愼始終。永圖富貴。悉之。

滁州許勅

報許勅語曰。兵食可去。無信不立。則知守信之道。乃是立身之本歟。苟若壞墮。自爲顛覆。訪知近日浙西周相公。頻差上元鎮使馬暨。專賫書曲。兼將金銀。送到和州。說誘秦彥。令歸浙岸。許授雪川。信使繼來。事情甚細。則未知秦彥終欲如何。且浙西素乏勳勞。驟沾恩寵。謂得長久。遽爲驕矜。殊不知人盡指楹。鬼多瞰室。惡旣天稔。道唯日亡。今更阻絕我通津。動搖我屬郡。已乖衆議。可見前途。以勅直木千尋。精金百鍊。固無憂於邪曲。終不改於貞剛。況乃邦媛相隨。家肥是保。永除異慮。必享同榮。或恐未審浙西所爲。先此告示。悉之。

壽州張翺

報張翺知已部領兵士。將赴令公軍前。言念遠征。倍所加念。且仗鉞者。皆誇闔外。分珪者。略滿寰中。而乃顧家產爲遠圖。剗國讎爲閒事。唯矜肉食。孰肯身先。今則翺首唱義聲。躬提銳卒。聘大丈夫之志氣。副上

宰相之指蹤。況知素蘊機謀。久施訓練。佇伸壯節。必樹奇功。當五馬離鄉。遠境之芳聲獨振。及六龍歸闕。前程之變化難量。暫此苦辛。善爲將理。今附衣段銀器茶藥等往。到宜檢領。春寒慎爲行李。將士倍與慰安。馳此不具。云云。

廬州楊行敏

報楊行敏使至得狀。送芝草圖一軸。覽之嘉歎。喜有餘懷。且草木之祥異也。雖自天成。皆因地秀。物有所應。吾何以堪。行敏始假都符。已彰瑞牒。天其誠爾。爾官慎之。況鄉號千年。村名穀祿。足驗一百年之壽。與二千石之資。固保前程之富貴矣。將酬美貺。更勵忠誠。非慙獎詞。慮驕銳志。悉之夏熱。切好將息。使迴附此不具。云云。

和州秦彥

報秦彥尙書使至得狀。兼送羊五百口。勤誠斯展。其數實繁。所謂爾羊來思。我愛其禮。況彥雖榮建隼。能効懸魚。遠傳廉慎之名。深舉撫綏之政。而乃特申懇悃。倍所歎嘉。旣無慮於觸藩。勉致功於荷篲。使迴附此不具。

盧傳

報盧傳殿中監裴尙書將到洪州武寧縣人吏百姓及僧道等狀。舉論傳前後戰敵賊徒。保全縣邑功績。一十五件。細覽事實。慰愜滿懷。傳不云乎。公侯子孫。必復其始。傳能資餘慶。無怠聿修。自值危時。使楊壯

節一呼義旅。四討寇徒。兄弟二人。義聲俱唱。遂得疲忙獲賴。廉使見知。始提百里之權。尋假六條之寄。忠誠所至。寵命非遙。勉慎始終。穩圖富貴。所希薦舉。必不弭忘。悉之。

戴盧

報戴盧。殿中監裴尙書經過彼縣。日得百姓僧道等狀。舉論盧自乾符五年主鎮。兼知縣事。課績一十三件事。皆撫實情。切舉能詞。理燦然。良增慰愜。盧竭誠報國。傾產忘家。糾集義軍。訓齊宗族。撫寧羸瘵。捕襲寇戎。六年於茲。一邑獲賴。有功不伐。唯善是從。遂領縣曹。永安鄉黨。古者田稱續命。邑號義興。求之於盧。未足多也。既增嘉歎。不忘薦論。勉保忠誠。終邀美命。悉之。

光州王緒

報王緒。天不容奸。人唯助順。苟違至理。必亂常刑。知緒昨因顏璋。久藏禍心。果致衆怒。璋既誅戮。緒乃奔逃。何不束手戎場。投身義域。而敢更謀嘯聚。尙恣喧張。自招相鼠之譏。莫識牽羊之禮。未知爾意。終欲奚爲。此乃先惠後誅。武經所重。好生惡殺。王化斯行。豁開誘善之門。俾臨歸仁之路。遂加誨諭。試問端倪。速仰割捨本情。指陳他望。待詳來狀。卽與指麾。禮云志不可滿。傳曰惡不可長。緒之今日。其意若何。勿驅齊眚。枉入罪網。秋冷切可將息。節級各與慰問。悉之。

楚州營田判官綦毋嶺

報綦毋評事。夫欲均調兵食。必須妙選公才。供億既多。料量非易。評事自匡郡政。甚洽物情。剗剗而案無

滯詞淬磨而筆有餘刃。今委兼判順國軍糧料。舉牒同封寄往。孔聖猶爲委吏。蕭何亦作功曹。唯託幹能。無辭猥屑。欲令小人懷惠。佇看君子勞心。悉之。

鄆州耿元審

報耿元審。古來名將。多是耿家。恭賈秉弇。徽音相繼。永言苗裔。固瞻機謀。元審雖名異雙聲。而志能獨立。佇申忠勇。別竢恩榮。況逢危難之秋。實建勳勞之日。勉存終始。慎守行藏。其他並令樊谷面述。今寄衣一副。烏觥茶二觔。到宜一一領之。秋涼切好將息。悉之。

海陵鎮高霸

報高霸。得進奏院狀報。知轉授右散騎常侍。永言欣愜。霈然滿懷。昔周盤龍破虜有功。繼霑爵賞。齊世祖戲之曰。卿著貂蟬。何如兜鍪。對曰。此貂蟬乃自兜鍪中出耳。當時以爲名對。前史標之美談。今此官榮。實彰君寵。唯在專勤戍邊。固守邊陲。更俟大來。永揚忠節。知之。

淮口李質

報李質。得進奏院狀報。知質轉授右衛大將軍。且自數年。君恩溥合。官榮職賞。可謂均沾。然而成功可爲。受爵無愧者。屈指而數。能復幾人。唯質久戍淮壖。遠防寇孽。勤勞最至。品秩尙卑。今授大將軍之名。乃滿烈丈夫之望。更宜慎守。無慮湮沈。慰愜歎嘉。不離懷抱。遣此不具。云云。

桂苑筆耕集卷十三

舉牒 五十首內行墨
勅牒詞五首

行墨勅授散騎常侍牒詞

授盱眙鎮將鄒唐兼御史中丞

授楚州刺史張雄將軍

授高霸權知江州軍州事

許勅妻劉氏封彭城郡君

請節度判官李瑄大夫充副使

請副使李大夫知留後

請高彥休少府充鹽鐵巡官

請泗州于濤尚書充都指揮使

王槩端公攝右司馬

右司馬王槩端公攝鹽鐵出使巡官

前邵州錄事參軍顧元夫攝桐城縣令

海陵縣令鄭杞

前宣州當塗縣令王翺攝揚子縣令

柳孝讓攝滁州清流縣令

前浙西館驛巡官鄉貢三傳張咸又攝山陽縣丞

前婺州金華縣尉李涵攝天長縣尉

前潁上縣主簿鄭綬攝盛唐縣丞舅韋絨評事薦

諸葛殷知樞酒務

李昭望充奉國巡官

柴嚴充洪澤雨塘巡官楚州營田

許權攝觀察衙推充洪澤巡官

王榮端公知丹陽監事

臧澣知鹽城監事

趙詞攝和州刺史

行墨勅授散騎常侍牒詞

勅淮南節度鹽鐵轉運等使東面都統兼指揮京西京北神策諸道節度兵馬制置等使牒某官乞右可

檢校右散騎常侍。餘如故。如將軍須言員外置同正員。牒准今年二月九日詔。應諸州有功刺史。及大將軍等。如要勸獎者。從監察御史。至常侍。便可墨勅授訖。分析聞奏者。大君降命。元帥從權。但云能立勤勞。特許先申獎勵。漢祖則手無刊印。不阻論功。武侯則心若懸衡。必能舉職。用示軍中之賞。式資闕下之恩。前件官。夙蘊壯圖。久從戎事。將救奔沈之患。固憑擒縱之能。桓榮祖之馳名。不唯馬稍。周盤龍之受爵。允稱貂冠。事須准詔。授檢校右散騎常侍。仍具申奏。並牒如者。故牒。

授盱眙鎮將鄒唐兼御史中丞

廣明二年六月十二日。使兼都統檢校太尉。平章事。燕國公牒。准詔云。將軍分闔。大夫出疆。可專未請之權。況奉已成之命。高懸懋賞。用報奇功。前件官。術繼白猿。名齊赤兔。夙歸信義。備察忠良。雖遷柱下之官。尚慊軍中之望。宜昇專席。更勵枕戈。爾其心保清廉。好對映淮之月。力誇驍銳。無慙破浪之風。事須准詔。行墨勅授御史中丞。

授楚州刺史張雄將軍

牒准詔云。見功必賞。漢高祖之殊恩。承制無疑。鄧司空之故事。前件官。材標落落。韻稟錚錚。自假使符。已揚政績。埋股肱之名郡。登耳目之高官。信義相從。功名愈振。佇擅外臺之寄。宜昇大樹之資。爾其益勵忠規。仰銜成命。用副劉宏之善舉。無嗟李廣之難封。事須准詔。行墨勅轉授右武衛將軍員外置同政。

授高霸權知江州軍州事

牒准詔應諸州刺史。如有軍功。卿量加爵賞。如有罪犯。卿宜書罰。別差人知州具狀申奏者。大元帥之權。既資成命。古諸侯之任。宜選良才。前件官。蛟躍池中。虎蹲岸上。用軍以義。守節唯忠。不辭白刃之危。累挫黃巾之衆。或短兵鬪勇。或圓陣呈奇。動有所成。往無不利。今以九江闕牧。一郡思春。將活疲氓。命憑幹吏。爾其遏強撫弱。削弊蠲苛。無登庾亮之樓。空知翫月。好把袁宏之扇。且學揚風。稍展政聲。佇沾恩命。事須准詔。行墨勅差知江州軍州事。仍具事由申奏。並牒知者。

許勅妻劉氏封彭城郡君

牒奉處分。古者官至大夫。室稱命婦。遂有從夫之貴。乃爲處世之榮。而況靜則能慎。內言動則克從。外役躬擐甲冑。志凌雪霜。功名既異於常流。封拜豈拘於成命。以滁州刺史許勅妻劉氏。英才天授。貞節日彰。平欺後魏將軍。洛陽失行。仰慕聖朝公主。司竹興兵。一昨專命良夫。討除叛卒。遽陳丹赤。固願同征。手驅組練之羣。遠攻城壘。身脫綺羅之色。久犯氛埃。四德有餘。六韜可試。豈獨家之肥也。實謂邦之媛兮。夫既冠其銀璫。婦宜榮於石窳。豈可使松標峻影。早致凌雲。蘿抱柔姿。猶嗟委地。先行茂賞。用報前功。軍中之晉爵策勳。與人從欲。天上之錦牋鈿軸。待鳳銜來。事須准詔。行墨勅封彭城郡君。仍表次錄奏。並牒知者。

請節度判官李瑄大夫充副使

牒。大夫天芝稟秀。霜桂含貞。蔚爾芳猷。每見用和爲貴。凜然直氣。終能嫉惡如讎。信知賢良。實救凋弊。頃者再握一同之政。曾標三異之名。既發縣花。佇分郡竹。而乃鷗鵬自滯。羔鴈相從。鉅鹿卑棲。劍川遠役。察

俗而唯資婉畫。犒師而不乏豐儲。果得入奏玉墀。出懸金印。洎某暫臨江陸。旋鎮海門。永言移節之難。咸假運籌之妙。一來淮甸。四換星霜。判官德以潤身。固爲己任。恩能濟物。不欲人知。莅事實繁。在公匪懈。筆直而吏多畏色。鞭輕而獄絕冤聲。見君子之用心。實古人之用意。十二年之宏益。久而彌芳。千萬里之追從。永以爲好。雖將徐榻別致。猶恐燕臺未高。今已假小秩宗。兼大司憲。不遷職位。何稱官榮。幸屈跡於副車。冀揚威於戎幕。陳寵宣詔條無失。嘗賴功曹。呂虔致郡俗永安。亦憑別駕。若言今日。彼在下風。事須請攝節度副使。表次錄奏。

請副使李大夫知留後

牒。大夫劍橫天外。珠媚水中。雄稜則仰決浮雲。溫潤則旁無枯草。深藏利器。久佐遠藩。每施婉婉之謀。共化蚩蚩之俗。五鎮相倚。一紀於茲。嘗於折獄按刑。唯遵直道。縱至旬休節假。不離公門。敢言知己之難。實荷成人之美。今已三年翫寇。尙恣侮張。十道徵師。遞相逼撓。若不專征。鉄鉞何因倒載。干戈遂驅。養勇之鋒。佇破稔奸之窟。代行拙政。留託長才。慰八郡之疲羸。察四鄰之助勤。冀使袁宏黎庶。粗識詠譎。無令陶侃賓僚。只耽閒戲。數年臥理。今日出行。皆資裨助之功。聿保始終之惠。事須請知觀察留後。

請高彥休少府充鹽鐵巡官

牒。少府學麟成角。詞鳳傳毛。偶輕桂客之遊。暫樂梅仙之曲。鶴唳而月籠寒野。萬里清音。鵬飛而雲籟長天。九霄高躅。幸聯宗黨。得接徽猷。敢興念於維駒。無見辭於絆驥。稍假縱橫之術。終匡幹連之權。雖慙燕

國之金臺。願接謝家之玉樹。同姓必親於異姓。今人何讓於古人。事須請攝鹽鐵巡官。表次錄奏。

請泗州于濤尚書充都指揮使

牒。尚書洞究儒經。旁探武緯。指清途於萬里。牧遠郡於三年。旗看隼飛。輶待鹿挾。慰疲甿以仁政。捍寇盜以智謀。克歸合浦之珍。曾散曲堤之衆。今者徐戎遺燼。敢恣侵凌。楚卒精鋒。佇期掃蕩。終免致包胥之哭。況非奪晉鄙之軍。但以鷹犬呈功。熊羆就列。須俟指揮之命。仍申搏噬之能。實託威權。遠希統攝。俾瞻馬首。皆知進退之宜。永滅梟聲。用審否臧之律。事須充都指揮使。其應援諸郡。及寧淮盱眙淮陰等三鎮將士。悉受指揮。

王槩端公攝右司馬

牒。端公烏衣茂族。鶴氅清流。早列官榮。頗精吏術。口中金石。常聆直韻之高。手下銅鹽。曾展長才之妙。事既同於外舉。理無愧於旁求。今則秩挂方書。職參典午。雖云承乏。且欲試能。憲府威稜。他日見豺狼懾伏。郡庭閒散。此時樂魚鳥留連。事須差攝右司馬。

右司馬王槩端公攝鹽鐵出使巡官

牒。奉處分。且權筦之設也。本資戎事。將贍軍須。既當薄伐之期。實藉均輸之利。能成重務。固選良才。端公韻振維山。慶流淮水。靜處五常之域。勤尋六義之門。每覽緣情。備知守節。繼委當仁之任。皆傳幹吏之名。已爲歷試。諸難可謂多能。鄙事。今以仰裨國用。旁濟兵儲。權課方殷。句稽匪易。官居典午。既已優閒。志在

推公無辭冗屑。佇縻幕職。立展籌謀。雖見王晞。長寄心於方外。何妨裴楷。暫勞力於俗中。事須請攝鹽鐵。出使巡官。句勘當司錢物。

前邵州錄事參軍顧元夫攝桐城縣令

牒前件官。善水無壅。謙山自高。腹飽詩書。口含鋒刃。厚利唯勤於耕道。閒情素懶於釣名。爲疎奔競之門。尙處卑棲之地。既能潔己。何惜愛人。州主簿之提綱。昔嘗留意。邑大夫之製錦。今可呈功。永言不憚勤勞。方謂克承闕乏。稍念時危而慎守。勿云俗弊而難除。一門多詠雪之才。衆推餘慶。百里渴象雷之理。勉振政聲。事須差攝舒州桐城縣令。

海陵縣令鄭杞

牒奉處分。字人之政。爲吏所難。欲俟三年有成。同須一日必葺。永言委任。實藉賢能。前件官深於詩。敏於行。不近劉輿脂膩。唯資謝朓膏腴。累假一同。備彰三善。睠彼東吳之近境。實爲南兗之奧區。昔也承乏多歡。去思猶在。今可以舉舊令尹之政。修真君子之誠。均調政刑。遍慰黎庶。展驥終希於得路。割雞無憚於發硯。行乎敬哉。勿墮乃事。須請攝海陵縣令。

前宣州當塗縣令王翺攝揚子縣令

牒奉處分。宰字之術。若驅羣雞。緩之則散。急之則亂。此言雖小。其理甚中。知者非難。行之不易。況乃隋城近邑。楚岸通津。螟蝗則久待消除。鯢蛇則每思養育。前件官相門積慶。儒室推賢。早登廉孝之科。嘗歷句

稽之任。雖棲下位。不墜令名。果逢連帥之知。再假字人之秩。雉誰忍捕。鵠自停喧。陶潛之腰腹。慙缺。孔奮之膏腴。不潤。今以揚子一同繁劇。四達要衝。每當使命交馳。實託宰僚勤幹。遂重責成之寄。況逢多事之秋。而乃有令患風。請告踰月。若言考秩。亦合替移。固選長才。俾修闕政。其在上瞻夏日。下視春冰。宜無憚於徒勞。佇有成於歷試。苟有經年沈醉。必虧莅事之能。如將終夕清談。亦失相時之理。勉於二說。慎自三思。事須差攝。揚子縣令。

柳孝讓攝滁州清流縣令

牒奉處分。今世之獎邑大夫也。多以河陽花彭澤柳爲美事。永言至理。我則不然。唯某在其視人如傷。潔己以仕。能懷冰蘖之操。迴掩花柳之名。實難其才。得副吾意。前件官展禽苗裔。言偃政能。曾宰濟陰。克安屬邑。久依江徼。靜守窮居。數年而雖甚食貧。直道而未嘗改節。今將歷試。俾假缺員。無興喧鵠之譏。勉致驅雞之術。事差攝滁州清流縣令。

前浙西館驛巡官鄉貢三傳張咸又攝山陽縣丞

牒奉處分。前件官族資鵠印。業練麟經。未躬壯圖。嘗從碎職。既精簡牘之事。寧辭州縣之勞。習傳之體有三。能詳正義。在公之心無二。宜慎爾官。往矣敬哉。賞罰斯在。事須差攝山陽縣令。

前婺州金華縣尉李涵攝天長縣尉

牒奉處分。夫縣尉之設也。其官雖卑。其務甚重。動在推詳滯獄。靜則慰撫疲氓。是以佐僚能慕其直聲。宰

尹亦懷其畏色。永言至理。實繁長才。前件官。性習五常。身資一命。嘗佐金華劇邑。頗傳玉潔高名。久見退修。誠思進取。俾助養蠶之政。且昇化鰭之資。其在襲作朝飧。冰爲夕飲。高懸曹棒。靜和宓琴。譽能息於鴻喧。勢必登於鴻漸。云云。

前穎上縣主簿鄭綬攝盛唐縣丞舅韋絨評事薦

牒奉處分。凡城一邑。皆列六曹。雖云具體而微。豈可從心所欲。況縣丞之佐理也。舍長憚其糾摘。猾吏稟其規程。苟能自強。何患不立。前件官。康成求己。季智奉公。曾申穎上之勤勞。遂見渭陽之論舉。桓譚貳政。且宜肅彼奸豪。殷浩吟詩。無用傷其貧賤。事須差攝壽州盛唐縣丞。

諸葛殷知權酒務

牒奉處分。權酤之權。起於漢代。會計之利。著在周經。既當預備闕懸。難可不從改作。將成重務。固選良才。前件官。隱豹含章。臥龍襲慶。潔己則隋珠無類。在公則庖刃有餘。昨分孔僅之重司。已成歷試。今躡魯匡之良策。何憚專勤。無辭鄭驛之卑棲。早致卓壚之餘利。能資美祿。必贍雄師。所期百姓無譁。非阻三軍告醉。事須差攝館驛巡官專知權酒務。

李昭望充奉國巡官

牒奉處分。昔孔子誠伯魚學曰。其先祖不足稱。其族姓不足道。然而大以流聲後裔者。豈非學之所致乎。若然則先祖之與族姓也。不唯時世所榮。亦乃聖人所重。前件官。搢紳上品。結綬中朝。方襲芸香。遽飄蓬

跡遠逃虎口。猶絆驥蹄。今以一言爲賢。三代可數。豈但渭陽之族。坐振重名。漂流淮徼之居。來承碎職。遂茲響應。用試才能。既知各有司存。唯在聿修厥德。事須充補楚州營田奉國巡官。

柴巖充洪澤雨塘巡官楚州營田

牒奉處分。三農就稔。一溉推功。苟非決降雨之渠。何以致如雲之稼。俾無隳墮。固藉專勤。前件官。壯志不渝。公才可任。承乏而善參軍事。慎終而益見吏能。今以洪澤近封雨塘美號。徵小喻大。昇高自卑。爾其靜勵冰心。潛窺水脈。勉稟龔黃之令。遠繼田曹。無慙鄭白之名。有虧地利。高懸賞罰。用試否臧。事須差充楚州營田院洪澤雨塘專知官。

許權攝觀察衙推充洪澤巡官

牒奉處分。撫俗所先。勸農爲最。是以鄭渾則奪其獵具。溫嶠則請置田曹。仰順天時。俯徵日力。俾督耕夫之業。須憑幹吏之才。前件官。歷試已多。忠勤可獎。令尹之功。成製錦。督郵之政。克提綱。但承闕乏之時。皆有輯綏之舉。今以山陽沃壤。淮畔奧區。地占三巡。田逾萬頃。非乏決渠爲雨。尙虧多稼如雲。蓋謂編氓。不勤功於穠蓂。縱當稔歲。皆失利於稻粱。知爾奉公。勸民務本。若使擾而不輟。必期敏則有功。委以農時。假之使職。永言從政。實可與權。無取潤於膏腴。苟徇私於毫髮。勉施乃力。廣諭衆心。事須差攝觀察衙推。充洪澤巡官。兼都巡勘指揮奉國謝陽等巡務者。

王榮端公知丹陽監事

牒前件官。蹈冰守節。飲水安貧。靜吟而篋有新詩。寂坐而門無雜客。卓爾君子。宛然古人。今以將濟軍須。誠資吏術。少輟琢磨之業。俾專鼓鑄之權。想夷甫之不言。無虧祖德。思仲宣之未遇。勉俟官榮。事須差知丹陽監事。

臧濬知鹽城監事

牒奉處分。若官無直道。則利有多門。凡歷任於牢盆。或成資於潤屋。而乃就此繁劇。守其潔廉。心誅則不惹脂膏。智刃則能分體脾。嘗聆斯語。罕覩其人。前件官。雅淡裝懷。清勤綰務。嘗握由拳之權課。唯遵止足之規模。休替未遙。功勞可驗。更資歷試。必濟重難。展才於近壘之鄉。守節於作鹹之地。不須對雪。空中吟謝朗之詩。只在熬波。言下見張融之賦。事須權糶。使巡官知鹽城監事。

趙詞攝和州刺史

牒奉處分。昔張緒子充。少好遊獵。右臂鷹。左牽犬。緒見而謂曰。一身兩役。無乃勞乎。充跪答曰。丈夫三十而立。今二十九矣。請至來歲。緒曰。過而能改。顏氏子焉。其後折節修身。終爲賢達。則古之豪俊。今可規模。前件官。脫跡迷途。投身義域。永除惑志。可獎懷容。既能資父事君。是得居官理務。俾參上佐。用試忠誠。況當缺榮之時。好縱安居之樂。詞其勉輸後効。善補前愆。已銷九族之憂。無起一朝之忿。事須差攝和州刺史。

